

**NATIONAL ASSEMBLY OF  
SEYCHELLES**

*Wednesday 04<sup>th</sup> June 2025*

*The Assembly met at 09am*

*National Anthem*

*Moment of Reflection*

*Mr Deputy Speaker in the  
Chair*

**MR DEPUTY SPEAKER**

Bonzour tou Manm Onorab, bann staff Sekretarya e piblik ki pe ekout nou e swiv nou travay pou sa Merkrede le 4 Zen, byenveni.

Ozordi nou travay i prensipalman dominen par Mosyon, nou a rapel premyerman i en Mosyon ki nou ti'n komans deba lo la yer ki pa'n terminen e ozordi alors, nou pou kontinyen avek bann lezot Manm ki reste lo nou *speech list*. E ler sa i a fini i annan en lot Mosyon ki dan non Manm elekte pou distrik Grand Anse Mahe ki nou pe fer.

E yer nou'n fer sorti en *Revised Order Paper* ki annan 2 *Bill* lo la ki nou, nou bezwen fer *First Reading* sa i apre ki *Bills Committee* in zwenn yer e konsider sa 2 *Private Members Bill*, enn ki dan non Manm elekte pou distrik Baie Ste Anne Praslin e lot ki dan non

Manm elekte pou distrik Mont Buxton.

Donk, avan ki nou pas lo bann entervansyon mon ava demann Madanm Deputy Clerk pou fer *First Reading* pou sa 2 *Bill*. Mersi.

**MADAM DEPUTY CLERK**

Bonzour Mr Speaker. Bonzour tou bann Manm Onorab, e tou bann staff *National Assembly Service* e tou dimoun a lekout.

*This Act may be cited as the Political Parties (Registration and Regulation) (Amendment) Act, 2025.*

E en lot *Bill*,

*This Act may be cited as the Penal Code (Amendment) Act, 2025.* Mersi Mr Speaker.

**MR DEPUTY SPEAKER**

Madanm Deputy Clerk. Donk, nou pou aprezan kontiny lentervansyon lo Mosyon ki dan non Onorab Bijoux e dan lentere Lasanble Nasyonal avek piblik mon ava zis relir Mosyon ki lir koumsa; -

“Sa Lasanble i eksprim sok avek lakoler vizavi logmantasyon dan labi zanfanki pe ogmante dan Sesel e pe demann bann agreser pou reviz zot konportman. Sa Lasanble i osi senpatiz avek tou bann viktim e siport tou lazans konsernen ki pe travay pou lit kont sa sikatris dan nou sosyete”.

Premye entervenan ki'n endike i oule koze ki lo lalis ki nou'n fermen depi yer se Onorab Naidu.

### **HON SATHYA NAIDU**

Mersi Mr Speaker. Avan mon al lo mon deliberasyon lo sa Mosyon mon oule zis eksprim mon apresyasyon vizavi bann parol ankourazan ki mwan mon'n resevwar, e byensir mon bann koleg in resevwar depi ler nou'n konfirman poudir ki nou pe vini pou nou prosen manda avek byensir sipor nou bann zabitan dan bwat vote 2025 Septanm.

An relasyon avek Mosyon ki'n ganny anmennen yer, i enteresan pou vwar ki mannyer Lasanble i kapab vin ansanm an sa ki konsern sa size, pou nou kapab eksprim nou lopinyon avek bi pou adres en defi ki'n nou sosyete pe fer fas avek.

Wi, Sesel koman en pei in annan pa mal progre ; in annan en kantite keksoz pozitiv, me selman nou pa kapab kasyet la realite. Fodre ki nou fer fas avek la realite pou nou kapab etabli en pli meyer demen, pou asire ki sa fitir zenerasyon ki pou grandi i kapab grandi dan en lanvironnman sen e sof avek tou bann proteksyon adekwat.

Sa i dwatet nou laspirasyon pou nou avans Sesel annavans. E Mosyon i pa

fer premye fwa ki nou pe diskite size labi zanfann isi dan sa Lasanble, in annan keston, in annan menm *PNQ* lo sa size kot bann statistik ki'n ganny prezante i bann statistik ki enkyetan, i bann statistik ki konsern nou tou.

E nou tou nou konnen e poudir ler in annan bann *ruling* ouswa zizman apre ki en zanfann in ganny abize lo en nivo inakseptab, i lo en nivo ki dimoun zot menm zot tant pou reazir avek komanter ler zot tann bann zizman ki ganny prononse, byensir bann Ziz pe travay avek bann Lalwa ki la, e dimoun an zeneral sot santi poudir ki santans pa ase sever e zot eksprim zot lakoler.

Me byensir Mosyon pe osi lans en lapel avek bann agrese seksyel, bann predater seksyel poudir revwar zot konportman. Me pou reviz ouswa pou aret zot konportman, i en keksoz ki ase entans pou sa dimoun fer akot sa i konsern lasante mantal en endividi kot in ariv a en serten pwen kot i pe komet bann akt ouswa bann atosite kot en inosan, kot en zanfann ki pa konnen ki pe arive avek li.

Me selman o firamezir i lo en baz repetitif i pe ganny fer, i klerman montre poudir ki nou annan en pousantaz nou popilasyon kot zot annan en maladi, en maladi mantal ki

dwatet ganny tretman appropriye.

Alors, ler nou pe koz lo revize ouswa aret sa konportman, nou bezwen fer sir ki lo nou kote nou annan ase resours pou nou kapab *deal* avek sa problemn. Byensir, pou met zot dan prizon i en keksoz, wi zot a ganny en santans.

Me selman ki pou arive si a serten moman sa bann endividi i retourn dan lasosyete? Eski zot pou kapab konport zot parey zot ti koman en sitwayen ordiner kot zot pe reste tou bann Lalwa ki an plas, kot zot pe respe drwa en zanfan? Absoliman ou pa pou vreman vwar poudir ki i kapab annan sa reform tan ki napa resours spesifik ki pe ganny *allocate*.

E nou tou nou konnen poudir size lasante mantal ki'n deza a en serten pwen ganny diskite dan Lasanble, enn bann pwen ki'n ganny fer resorti se nou bezwen alokasyon resours. E en keksoz ki mon kontan pou tande ler Minis Valentin ti pe diskit lo reform ledikasyon se vizavi *scheme* ler le mwayen finansyel i pou permet le lesansyel pou ganny fer.

So, alors mon panse ki vizavi tretman pou sa bann endividi ouswa bann endividi ki annan bann tandans ki relye avek sa maladi nou

bezwen kapab fer alokasyon resours appropriye.

Wi, i pou annan en sant reabilitasyon ki non selman pou tous lo adiksyon me osi pou al lo laspe lasante mantal. In annan plizyer Onorab ki'n koze yer, kot zot in fer resorti poudir fer sa bann dimoun ki annan bann move tandans pou vin devan, pou rod en gerizon pou sanz zot konportman, me nou bezwen fer sir ki nou annan ase resours pou nou kapab fer fas avek sa sityasyon ki la.

E byensir, i annan en poursantaz bann abizer kot a en serten pwen dan zot lavi zot, zot in ganny abize e bann konportman ouswa bann karakteristik in ganny formilen atraver bann labi ki zot, zot in pas atraver e se sa ki'n afekte zot *psyche*, se sa ki'n afekte zot konportman e finalman a en serten pwen i arive ki zot pa pe realize sa ki zot pe fer i mal.

Me sa se akòz a en serten pwen sa ki dan zot lavi zot osi zot in ganny abize e zot komans viv dan en serk ki vreman visye.

E ler nou pe regard sa i osi egalman enportan pou nou kapab konsyatiz nou bann zanfan a en tre zenn az dan bann lekòl kot i annan en *curriculum* ki vize ver *PSE*.

Me selman i annan en laspe ki tous lo labi zanfan

byensir nou bezwen komans sansibiliz zanfana en tre zenn az depi nivo primer ziska segonder pou zot kapab konpran kot *the fine line is* vizavi bann- parey Onorab Roucou ti'n fer resorti poudir - kot i pa apropiye ki en zanfana i ganny touse par legzanp i komans koumsa li.

E apre i devlope apre i vin bann tandans ki ekstrenm, e i ekstrememan enportan ki nou bann zanfana i ganny enkilke avek sa konesans. Konmela zanfana e en tre zenn az zot komans atrap en telefonn, en *tablet* e zot sitan avanse avek teknoloji, e avek teknoloji i anann en ta lenformasyon osi la deor.

Parfwa ou pou krwar ki ou pou kapab limit zanfana a sa ki konsern lenformasyon ki a zot porte, me nou konnen poudir ki zanfana i bokou pli matir an konparezan avek avan an sa ki konsern lenformasyon ki zot konsonmen.

Alors, mon santi i bezwen annan en lapros - byensir mon pa pou dir *no filter*, me byensir i bezwen annan en lapros kot nou bezwen konsyanstiz nou bann zanfana lo sa size ki mannyer eksi zot osi zot drwatet vin devan a en moman kritik, moman kritik sa e le moman ki i ariv ki zot drwatet vin devan.

Me problem se i ariv lo en baz repetitiv pou plizyer lannen e apre ki sa ka i vin devan e *by the time* pou sa zanfana ki'n pas dan sa troma in preski fini tro tar, e i bezwen sa led sikolojik pou kapab akonpany li pou li kapab rekouver, pou li kapab al annavan dan son lavi.

I annan en serten lenstans en dimoun in kapab ariv 35 an, 45 an e in kapab ganny abize a laz 10 an me i pe anmenn sa troma tou dilon son lavi e i en lour ki pa fasil pou annennen pou bann viktim. E alors i ekstrememan enportan ki i annan alokasyon resours. E an menm tan nou bezwen ankouraz nou bann zenn, nou bezwen ansennyen, nou bezwen ners e nou bezwen diferan klas travayer.

E lo sa laspe ki la pou nou kapab geri nou nasyon, nou bezwen kapab fer sir pou sa prosen 10 an - en deseni ki pe vini, nou annan sifizaman resours ki pe ganny mete kontinyelman pou nou kapab al annavan. E byensir, baze lo resours ki deza egziste, i annan diferan antite ki pe fer en travay eksepsyonnel, mon bezwen dir eksepsyonnel dan ki sans se la kantite zot ki pe fer sa travay i tre minim an konparezon avek la kantite ka ki la deor.

E baze lo bann sif nou'n war poudir ki nou bann *social*

*workers* zot donn tou zot kouraz pu fer bann vizit ansanm avek nou koman Lotorite Distrik ler nou tann en lenformasyon pou nou al verifye, nou war zot pe fer bann rapor apre ler travay ouswa pe menm al lo teren.

Me byensir, se zis- i pa zis travay en *social woerker* i pa zis travay Lotorite Distrik, i pa zis travay lekol, i pa zis travay Gouvernman i travay nou tou, i travay nou pep i vin lo en baz lakominote.

Si nou oule elve en vilaz pou elve en zanfán, nou bezwen fer sir ki sa vilaz i en vilaz kot tou bann sitwayen ki responsab, ki annan sa konesans, ki annan sa ekspertiz pou zot osi vin devan pou donn en koudmen dan sa demars, pou nou kapab fer sir ki nou pe pran swen avek nou bann zanfán.

Bann zenerasyon oparavan se sa ki ti pe ganny fer a en serten pwen, me i paret nou koman en nasyon nou koman en pep, mon pa konnen kote, i paret nou'n perdi sa valer. Nou'n perdi sa eleman respe ki menm bann zanfán a en serten pwen nou ti'n annan pou nou bann gran dimoun.

Me la, nou bezwen rekilke bann valer ki a en serten pwen ti la pou nou kapab fer sir ki nou bann zanfán i ava ganny sa

lakonpannyman neseler parmi la konomite. E byensir ler nou pe koz la kominote en dimoun i kapab pe regard mwan pe dir be eski nou kapab met konfyans dan tou bann dimoun ki dan la kominote?

Byensir, se pour sa rezon ki i annan *child sustainability checks* pou nou fer bann travay verifikasyon pou asire ki sa adilt, ki sa dimoun ki travay ek sa zanfán in pas atraver sa sistenm filtrasyon, pou fer sir ki nou annan en dimoun kot son leta mantal i annord pou li kapab ed sa zanfán.

E nou pou bezwen fer sa travay aköz malerezman pa tou paran ki pe fer zot rol koman paran isi dan lasosyete i en fe sa, i annan en ta paran ki pe fer zot bout, me i osi annan paran ki pa pe fer zot bout.

E nou koman bann dirizan ki kapab idantifye bann zanfán ki pe pran en semen ki i pa devret pe pran i drwatet nou responsabilite pou nou eksplor nou posibilite pou regarde ki mannyer eski nou kapab rod en lapros *tripartite*, kot i annan lenterferans atraver Gouvernman lo baz la kominote, Sekter Prive e menm sa paran finalman pou nou kapab akonpanny bann

zanfan ki bezwen sa latansyon ki bezwen sa led.

Mon rekonnnet bann zefor ki deza an plas me i annan bokou plis pou nou fer dan sa direksyon ki la. E an relasyon avek sa size li menm, mon rapel pli boner mon ti pe fer referans avek santans e byensir se atraver en ka an partikilye ki'n fer Mrs Matilda Twomey akote bann lezot parti prenan dan bann diferan departman respektiv, pou asiz otour en latab pou zot kapab formil en rapor ki koz lo sa *model law*, i koz lo sa *Child Law Reform Committee* ki ti vin avek sa *Sexual Offences Bill*.

E baze lo bann kestyon ki'n ganny poze isi dan sa Lasanble, Onorab Sebastien Pillay ti'n anmenn en *PNQ*, Onorab Anne Bistoquet ti'n demann lo la, mwan mon'n demann lo la - mon rapel Onorab Vidot osi in amennen, kot tou le de kote latab in poz kestyon lo sa Prozedlwa.

Akoz i nou lentansyon pou nou fer sir ki nou annan en Prozedlwa ki azour avek la realite la deor, pou fer sir poudir ki sa bann abizer i ava ganny *deal* avek e ler i annan pinisyon sever, ler i annan en santans sever, i ava fer sir ki sa bann dimoun ki nou pe dir ozordi arete ek sa konportman, reviz ou konportman pou aret afekte en lot, pou fer sir ki zot

konnen poudir ki i annan en konsekans ki atase avek zot aksyon.

Wi, koman en pei, koman e nasyon nou bann en ta koman en priyorite. Depi ler sa Lasanble in komanse, setyenm Lasanble e menm egalman tou bann Lasanble i annan bann Prozedlwa ki ganny pase e i anliny avek priyorite pei. E in annan pa mal keksoz ki nou'n bezwen fer pandan sa dernyen 4an edmi pou nou kapab met nou pei annord, anliny avek lemonn ki nou pe viv ladan ozordi 2025.

Me mon panse poudir ki i bezwen annan en zefor ekstraordiner pou nou kapab fer sir ki si i annan kek posibilite avan 7enm *cohort* i fini, pou nou al anmenn sa Prozedlwa. Ouswa si non le moman ki 8enm *cohort* i komans son travay, enn bann premye keksoz ki sa Lasanble pe devret diskrit lo la se sa *proposed Sexual Offences Bill* pou nou en fwa pour tou azir dan en fason ki anliny avek travay ki'n fini ganny fer.

E alors, i annan en travay ki bezwen ganny fer lo lapar *Attorney Zeneral* atraver son *legal draftsperson*. I annan travay ki PS Melanie ki deza in dir isi dan sa Lasanble poudir zot pe fer sa travay, alors, silvouple met en pe plis zefor, vin otour sa bann latab

pou zot kapab finaliz zot bann diskisyon.

I enportan pou Departman Lapolis ek lasante fer zot par pou fer sir ki ler sa zofisye pe drafte sa Prozedlwa pe rod sa lenformasyon, i donn sa lenformasyon atan, pou nou fer sir ki nou annan en Lalwa ki anliny avek la realite ki nou pe fer fas avek.

Wi, i en keksoz reaktif nou bezwen fer sir ki nou pe fer tou lede laspe *the preventive and the reactive approach has to be in place*, pou nou kapab anpes lezot zanfann ganny abize - nou bezwen fer sir ki nou pe met tou bann *safeguards in place*.

Me an menm tan nou bezwen fer sir ki ler in annan bann dimoun ki abiz zanfann, i annan Lalwa ki sever e tou sa bann dimoun pou ganny *deal* avek enn fwa pour tou. Nou pa pou kapab kontinyelman war bann ka labi pe al Ankour, apre i annan bann santans ki Lepep Seselwa i eksprim zot fristrasyon ver.

Alors, i ekstrememan itil e mon lans en lapel avek loter Mosyon pou fer en swivi profon. Akoz nou tou nou konnen poudir Mosyon pa *binding*, i napa en konsekans legal, alors i ekstrememan enportan si i annan kek potansyel pou Onorab Bijoux.

E mon salye li pou sa zefor ki'n in mete ou anmenn

sa size devan, pou ki i kapab osi fer en swivi avek bann diferan lazans pou regarde kote eski sa Prozedlwa i ete e pou nou met tou zefor posib pou nou fer sir ki si pa sa *cohort*, ler sa lot *cohort* i komanse sa Prozedlwa i pe ganny diskite dan sa Lasanble pou nou kapab asire ki nou pe fer le lesansyel vizavi sa size ki nou, nou pe koz lo la.

Akoz koze i en keksoz, aksyonnen i en lot keksoz, i e ekstrememan enportan son laspe ki konsern aksyon. I annan bokou ki pe ganny fer, me selman i annan ankor plis pou nou fer. *There's always room for improvement*. Annou pa zis asiz kot nou ete poudir dir keksoz i *ok* apre nou arete e apre nou pa fer le lesansyel i enportan ki nou fer le lesansyel.

E mon remersye Onorab Bijoux pou sa Mosyon ki in anmennen, akoz i montre poudir ki i tre konsernen avek sa size ki Lasanble Nasyonal lo tou le de kote latav lo en baz bipartizan ziska prezan pe trete. E mon swete ki nou vwar sa Prozedlwa akoz i pa fer sans ki nou pe zis koz isi apre nou pa pe vwar aksyon ki pe swiv. Mersi bokou.

### **MR DEPUTY SPEAKER**

Mersi Onorab Naidu. E baze lo fason ki in komanse in koz apepre 15 minit, si larestan

Manm i kapab reste dan sa *time limit* zot a fer mwan en gran plezir. Onorab Romain.

### **HON GEORGES ROMAIN**

Mersi Mr Speaker. Bonzour Mr Speaker. Tou mon bann koleg Onorab e tou dimoun a lekout. E en bonzour spesyal pour tou nou bann zanfan, anvi ki zot osi fek fini fet zot lafet.

Mr Speaker, mon ti a voudre dir enn de pti parol lo sa Mosyon akòz mon santi ki i en problem ki pe agrandi dan nou sosyete e ki pe afekte lavi nou bann zanfan, ki viktim sa bann labi e osi bann dimoun dan lantouraz sa bann zanfan. E sa i vreman sagrinan e i en keksoz ki i pa merit arive. E sirtou avek nou bann zanfan ki inosan.

I pa toultan fasil pour nou koz lo sa size. Me mon krwar i enportan ki nou fer sa konversasyon vin pli an piblik, ki i a petet ede pour nou vwar laklerte pou elimin sa bann problem labi enn fwa pour tou.

I malere Mr Speaker, ki bann statistik pe demontre ki i annan en logmantasyon dan bann ka labi lo bann zanfan isi dan nou pei, ki pa zis seksyel. Me osi fizik ek mantal.

Sa pour mwan i trakasan e i bles mon leker, akòz mwan osi mon en paran e mon kapab santi douler en lot paran ki pe fer fas avek en tel sitasyon. E

an plis, konpran sa lafreyer e sa troma ki sa zanfan pe pas ladan.

Mr Speaker, en zanfan ki ganny abize, ki swa seksyelman, fizikman oubyen mantalman, i soufer bokou. E sa soufrans i enn ki reste ek li e i vin en problem lonterm.

Sa zanfan i kapab devlop problem emosyonnel. I perdi konfidans. I reste mekontan, sagren. E menm kapab tonm dan en gran depresyon.

Labi i kapab fer en zanfan perdi konfyans dan bann adilt e osi kapab afekte son abilite pour li fer zanmi. E i annan bann relasyon pozitiv dan son lavi.

An gran disan, sa i afekte son lavenir akòz i perdi tou konfyans dan bann dimoun otour li. E sa i annan lenpak negativ dan son fanmir e dan son lavi sosyal.

En zanfan ki ganny abize i osi annan plis risk pou vin viktim lezot problem konportman bokou fwa. I bezwen bokou sipor pou refer, pou ede pou geri sa troma ki'n fer fas avek.

Mr Speaker, pour mwan, tou i komans avek devlop bon valer e ledikasyon ki devret komans depi dan lakour. Nou zanfan i nou fitir e zot merit pe grandi byen dan en lanvironnman sen e sof.

Si koman bann paran nou koz ek nou zanfan byen,

nou elve zot byen, nou pas letan avek zot pou konpran zot pli byen, bokou sa bann problemn pou kapab ganny rezourd.

I enportan pour nou note ki en zanfan pa kapab touzour kapab konpran, oubyen menm eksprim sa ki zot pe pas ladan dan zot lavi. I enportan ki paran i kapab enterakte avek zot zanfan e reste pros ek zot zanfan, pou kapab detekte okenn siny ki en zanfan i kapab dan problemn.

Lo kote bann zanfan, i enportan pour zot konnen kwa ki byen e kwa ki mal ler en adilt pe enterakte avek zot. E pour mwan, paran i devret pe zwe en gran rol pou edik son zanfan, akòz sa i pou ede protez son zanfan kont bann abizer.

Mr Speaker, an plis, zanfan i bezwen santi li konfortab pou kapab apros en lot adilt ki responsab parey zot ansenyan, en lot Manm fanmir pou raport en tel problemn. Nou devret toultan ankouraz zanfan pou vin devan si zot pa santi zot an sekirite.

Mr Speaker, pour mwan i sagrinan pou tande ki annandler, se bann fanmir ki soutir bann abizer. E menm si zot konnen ki pe pase, zot pa dir naryen akòz petet sa abizer pe donn zot lezot benefis.

E la nou vwar ki sa zanfan i kontinyen ganny

abize. E la mon krwar ki kominote antye i merit vin ansanm e vin pli vizilan pou ede idantifye ler nou santi en zanfan pe pas dan en problemn. Annou raporte e pa touf sa problemn. Annou met li o kler e fer lotorite konsernen okouran.

E la, mon pe koz vwazen, ansenyan, zanmi, fanmir ki dan lavi en zanfan, ki sispekte en keksoz pe al mal. Annou pran aksyon pli vitman pou esey ed sa zanfan, dan plas apre pour nou dir; zot mon ti doute. Oubyen; zot mon ti konnen keksoz mal pe pase. Me la i pou kapab fini vin tro tar.

E la mon demann bann lazans konsernen annou pa tarde pou reazir ler nou sispe ki i annan en problemn. Akòz sa zanfan pe depan lo nou pou sov li. E pli nou tarde, pli sityasyon i agrave.

Mr Speaker, pour bann ki pe abiz bann zanfan, nou dir zot byen for ki zot aksyon pa akseptab ditou e pa pou ganny tolere. E mon krwar Lalwa i devret menm vin pli server kont zot.

En zanfan i merit ganny proteksyon lanmour e respe. E zot koman bann abizer zot merit konpran ki zot aksyon pe detrir lavi nou bann zanfan. E alor, zot pou bezwen fer fas avek konsekans zot bann move aksyon.

Mr Speaker, pou terminen, mon ti a voudre dir ek tou paran. Annou vin pli pre ek nou zanfán. Annou konpran ki en zanfán i bezwen zot paran pros ek li. Pa zis fizikman. Me osi emosyonnel. Annou pa negliz bezwen nou zanfán. I bezwen toultan santi li an sekirite e proteze. E sa se responsabilite nou koman bann paran pou donn li sa sekirite.

Annou konpran ki en zanfán i bezwen lanmour pou grandi byen. Koumsa i pou aprann sa bann valer ki pou fer li devlop ek en bon latitud e vin en adilt ki kapab kontribye pozitivman dan lasosyete.

Annou pa les okenn nou zanfán soufer an silans. Annou asire ki i toultan annan bon kominikasyon e lanmour kot lakaz pou ede protez nou bann zanfán e fer en diferans dan zot lavi.

Mr Speaker, la mon le profite pou dir mersi tou bann travayer Sosyal ki pe fer sa bon travay, ki pe ede pour nou bann zanfán viv byen dan lakominote.

Mon ti a voudre osi dir Mr Speaker, ki i deza ariv en sitasyon ek mwan dan Anse Etoile, kot sitasyon ti arive kot nou ti *call* Sosyal e zot ti vini. 2 zofisye ti vini ansanm ek lapolis.

E pour sa mon le dir zot mersi pour sa travay ki zot ti

fer sa zour. Ti vreman en travay vreman profesyonnel. Mon dir zot mersi atraver zot Minister. E osi san oublie NCC ki osi pe ede pou fer nou bann zanfán viv dan en lanvironnman sen e sof.

Alors Mr Speaker, mon le dir Onorab Bijoux ki i pou ganny tou mon sipor pour son Mosyon akòz i vreman en bon Mosyon. Mersi Mr Speaker.

### **MR DEPUTY SPEAKER**

Mersi Onorab. Mon pou donn laparol aprezan Onorab Woodcock.

### **HON WAVEL WOODCOCK**

Bonzour Mr Speaker. Tou Manm e tou dimoun a lekout. Espesyalman zabitan Grand Anse, Praslin.

Mr Speaker, mon pou bezwen ozordi bomaten zwenn avek bann lezot, menm ki'n koze avan mwan depi yer, pou eksprim mon lakoler. En pe mon dezapwentman.

E osi ou kapab dir en pe sok, ler ou pe get dan nou pti sosyete ozordi ou pe war sa logmantasyon dan bann ka labi. Labi kont zanfán. Sirtou labi seksyel ki'n ogmante dan nou pti pei Sesel.

E parey loter Mosyon avan mwan in met o fe bann statistik lo bann diferan ka labi kont zanfán ki pe arive dan nou pei ozordi. Annefe, in fer nou konpran poudir i

annan 413 nouvo ka labi zanafan. E ladan i annan 145 ka labi fizik. Sa se pour lannen 2024.

E yer enn bann entervenan ki'n pran laparol, enkli *Leader* Lopoizisyon osi in koz lo plizyer bann ka. E lezot Manm osi in fer nou rapel plizyer bann ka ki'n ganny televize ki'n pas dan nouvel, ki'n anmenn serten degou, lakoler parmi piblik.

Bann ka kot nou'n war labi fizik kot nou war bann zenn zanafan *as young as* 2 an, 3 an, kot bann labi fizik ki zot in fer fas avek in koz zot, zot lanmor.

E tousala i bann keksoz ki parey mon'n dir, in sok pep Seselwa. E i enportan ki konman en kominote, konman en pei nou met plis lanfaz pour nou protez e sofgard nou bann zanafan.

E sa i en travay ki nou tou nou bezwen travay ansanm. E ozordi mon apresye ki en Mosyon ou kapab dir i bi partizan. Kot nou tou nou agree poudir nou bezwen fer plis pou protez nou zanafan.

Onorab – osi yer in fer nou konpran poudir i annan 137 labi seksyel. E nou'n war osi dan nouvel, parey mon'n dir. Menm lo rezo sosyal, bann ka ki'n ganny bokou latansyon.

Bann ka kot nou'n war pti baba, zanafan, bann

*toddlers* 2 an ki'n pas dan sa bann kalite labi Mr Speaker, ki'n sagrin nou nasyon. Ki'n fer nou tou ankoler. E Sesel nou pa en pei ki *condone*. Nou pa krwar dan *capital punishment*.

Me selman si - mwan sa mon pe koz lo mwan menm Onorab Woodcock. Me si ti annan en ka ki mon dir ti merit annan *capital punishment*, se bann dimoun ki abiz bann pti zanafan. 1 an, 2 an pti baba Mr Speaker, aköz sa i pa akseptab. Sa i mon lopinyon Mr Speaker.

E mwan mon fransman en keksoz ki mon vremen annan bokou lakoler, ler mon tann, mon aprann sa bann keksoz. Ou swiv. Ou war dan nouvel Mr Speaker. I afekte nou en kantite nou tou konman paran ler nou tann sa bann keksoz Mr Speaker. I fer nou bokou – i anmenn nou bokou sagrinasyon.

E malerezman dan nou pei osi Mr Speaker, i annan bokou – bokou ka *neglect* osi. Aköz ler ou pase dan bann distrik aswar. E mon'n war sa sirtou dan bann *housing estate*. Pa zis lo Mahe, me en pe lo Praslin osi.

Kot ou war bann zanafan 8er, 9er pe trennen lo semen. Ou demande oli paran. 9er, 10er ou war en pti zanafan pe marse tousel lo semen. Ou a dir kekfw a en zour. Be ou pase

ou war sa menm zanfan lo semen.

Paran i dan drog. Swa paran i dan lalkol e zanfan i ganny negligize. E sa i en konsern serye pour nou sosyete. I pa zis en travay pour Sosyal. I pa zis en travay pour ansenyan. I pa zis en travay pour Manm Lasanble Nasyonal. Me i osi responsabilite bann paran osi pou sofgard zot zanfan. Mon pou al lo la en pti pe pli an detay pli tar.

Mr Speaker, mon premye *attachment* ki mon ti fer ler mon ti fini mon letid *Polytechnic* sete konman en *social worker* Grand Anse, Praslin. E osi mon ti travay – mon ti fer mon dezyenm *attachment* mon ti al fer YRTC. E pli tar mon'n en *social worker* YRTC.

E ti sok mwan Mr Speaker, ler mon ti fer *attachment* avek *Social Services* Praslin pou aprann sa kantite ka. Ka labi ki ti annan. E labi seksyel, labi fizik i pa en keksoz ki fek konmanse ozordi.

Me ozordi i pli o kler, akòz nou annan rezo sosyal e ozordi nou kapab war plis sa bann ka ki pe ganny mete lo rezo sosyal. E ozordi bokou plis lanfaz pe ganny mete lo labi zanfan ki petet lontan ti en tabou kot paran, fanmir ti kasyet.

Me la ozordi avek lafason ki lemonn i modernize, dimoun i pli o fe e sa bann keksoz i pli dan piblik pou dir; be ou konnen poudir ka labi seksyel kont bann zanfan i reel. Ka labi fizik sever kont nou bann zanfan i reel dan sa pei.

E Mr Speaker, nou tou nou rapel an 2020 sa fame ka. Sa ka ki ti anmenn bokou degou, lakoler dan popilasyon Sesel. Sa ka kot 3 zonm, kot ti annan en *sexual abuse ring*, kot ti annan bann *predators* Mr Speaker. Kot zot ti pe servi medya sosyal pou *prey* lo bann zanfan pour zot *blackmail* bann zanfan.

Nou rapel sa ka ki ti *involve* anviron 75 zanfan. E ti annan zanfan pli zenn ki – pli zenn mon krwar si mon tronpe ti annan laz 10 an.

E sa ti vreman sok nou. Mon krwar ti an 2020 sa ka ki ti ariv devan Lakour Mr Speaker. E nou war ozordi en zouti ki bann *predators* pe servi ki mon krwar i enportan konman en nasyon, i enportan ki nou donn plis ledikasyon nou bann zanfan konman paran, e osi dan lekol. Se rezo sosyal. Ozordi nou annan bokou bann *predators* lo rezo sosyal. Zis parey dan sa ka, nou ti war ki sa 3 zonm ti fer.

Zot ti fer krwar ki zot servi *profile picture* en zenn fiy. En *model*. E apre zot apros sa

bann zenn fiy dir zot, zot en *model*. Alor zot pe rod bann lezot fiy ki ti a kontan fer sa louvraz e in fer sa bann zanfan anvoy portre. E apre zot in servi sa bann portre pou *blackmail* sa bann zanfan.

I annan en bann ki'n servi bann *fake profile* en zenn garson. Enn zot *peers* ouswa pou fer krwar sa – saler i bann zonm, bann adilt, pour zot bat latet sa bann zenn pou fer sa bann zanfan pou fer anvoy portre.

Apre zot servi sa bann portre ki sa bann zenn in anvoye pour zot *blackmail* sa bann zanfan, pou dir si zot pa fer tel aksyon seksyel, zot pou met sa bann keksoz dan piblik. Zot pou anvoy portre kot paran.

E bokou bann zenn bann zanfan ti tonm dan sa latrap Mr Speaker, e bokou zot ti ganny abize Mr Speaker. E sa en keksoz ki ti sok nou. E sa in kree osi plis *awareness* lo bann zouti ozordi ki sa bann *predators* pe servi pou *lure* nou bann zanfan, pou *entrap* nou bann zanfan. Pour zot abiz nou bann zanfan.

E parey mon'n dir, i enportan pour nou donn plis ledikasyon lo rezo sosyal. E ozordi bann zanfan tanzantan en nouvo kalite fenomenn ou war i leve dan rezo sosyal.

Ozordi bokou zanfan i servi *TikTok*. Ou war zanfan

anba laz pe servi *TikTok*. I lo *Facebook*. I lo bann lezot – *WhatsApp* e lezot ankor. E i enportan ki nou kree plis *awareness*.

E i enportan dan lekol ki nou edik nou bann zenn, nou bann zanfan pou fer sir ki zot anvoye, ki zot fer, avek ki zot koze. Akoz i annan sa bann dimoun. I annan sa bann move dimoun ki servi bann *fake profile* pou sey anbet nou bann zanfan, pou sey *blackmail* nou bann zanfan.

E i enportan ki nou tou nou vin pli vizilan. *Teachers*, vwazen, bann *peers*. I enportan ki nou pe sofgard nou bann zanfan. Nou koleg dan lekol, nou *classmate*, i enportan ki nou osi nou gard en lizye pli pros.

Si nou war konportman dan en zanfan pe sanze. Ou war en zanfan ki abitye toultan *charismatic*. Toultan aktiv, ou war li petet i pli rezerve.

Ou war serten mark lo li. Ouswa ou war li dan en kwen. Ou war son konportman i sanze. I enportan pour nou kestyonn sa zanfan. Apros sa zanfan. Koz ek li pour nou *find out* akoz sa sanzman dan konportman.

Parey mon'n dir, nou war bokou *neglect* ozordi dan nou sosyete. E nou war nou bezwen fer atansyon. E sa en lapel ki mon fer avek bann

paran. Nou bezwen fer sir ki nou pa kit nou pti zanfan. Si nou annan en zanfan 3 an, 4 an, 5 an tousel dan lakaz. I annan ki'n arive. I annan bann ka ki'n arive in kit zanfan dan lakaz kot bann lensidan serye in arive.

I annan bann ka kot nou kit nou zanfan. *Anyway*, mwan mon pa fer sa. I annan sa bann paran ki kit zanfan avek nenport e ki. Zot pa gete avek ki zot kit zot zanfan. E sa en keksoz ki nou bezwen veye, aköz sa bann keksoz i kapab *lead* pour ou zanfan ganny abize avek en dimoun ki i annan bann motiv – *ulterior motives*.

Alor Mr Speaker, parey plizyer Manm in koz lo la, sirtou *Leader* Lopoziyon. E Onorab Naidu osi in met bokou lanfaz lo sa *Child Law Reform Committee*. *CLR - CLRC*, kot en *Sexual Offender Bill*, annefe e i en *proposed Model Law* ki osi kouver labi zanfan. E lo sa *proposed Bill* e menm sa rapor ki ti osi ganny propoze par sa komite, ki ti *involve* plizyer *stakeholders*. Lakour, lapolis, travayer Sosyal. E bann lezot *stakeholders*, kot en *Model Law* ki kouver labi seksyel. Labi zanfan.

E sa rapor ti ganny prezante avek – enkli sa *Model Law* ti ganny prezante avek Prezidan an Zilyet 2021. Mon

konnen poudir ler en *Model Law* i ganny drafte, bann antite Gouvernman ki sirtou Sosyal. E i bezwen repas lo sa Lalwa.

E mwan mon santi poudir i enportan ki nou reviz Lalwa. I deza annan bann Lalwa ki *deal* avek bann *sexual offenders*. Me selman, ek modernite avek lemonn ki pe toultan evolue, i enportan ki nou reviz bann Lalwa ki deza egzistan e annan en Lalwa ki *deal* spesifikman avek serten size.

Sirtou ki mon kapab dir, bann size ki vreman annan lenpak lo nou pei. Bann lenpak negativ parey ki labi seksyel ozordi. Labi fizik, *neglect* i annan lo nou sosyete Mr Speaker.

E Mr Speaker, en keksoz mon bezwen dir. Mon krwar poudir yer osi Onorab Hoareau in koz lo la. Anr non. Onorab Romain in koz lo la e Onorab Sathya Naidu osi in tous lo la. E lezot Manm ankor. Onorab Desheila in koz lo layer.

Kot annandler ou kapab annan bann ka legal. ou kapab annan Lalwa. Me pa zis kad legal ki pou anpes labi. Annefe, Lalwa i la pou *deal* avek bann ki kas Lalwa avek bann *offenders*. I preskrir penalti pou kas Lalwa.

Wi, dan en serten sans i kapab ede e azir konman en

*deterrent* pour en dimoun fer sa lofans. Me *at the end of the day*, pa Lalwa ki pou anpes en endividi komet en lofans. I pran plis ki sa. Parey sa fame *saying* ki dir; *it takes a village to raise a child.*”

E nou tou nou bezwen zwe nou rol. E parey mon'n dir, pli enportan se paran. Nou tou nou bezwen vin ansanm. I pa letan pour nou blanm kanmarad, pour nou *point fingers*. Me i en letan kot nou bezwen ralye ansanm.

E i sagrinan ozordi dan nou sosyete nou war kot zanfan pe fer zanfan. Zenn anba 18 an pe fer zanfan. Zenn 16 an, 17 an olye konsantre dan zot letid. Olye *acquire* bann *skills* pour zot devlopman e pour zot lavenir, ou war zot pe fer zanfan anba laz.

E i malere Mr Speaker, kot ou war dan nou sosyete ozordi – e enterven an avan mwan in koz lo la, Onorab Romain. Kot ou war paran – paran pe soutir zanfan. Pe soutir zanfan ki ankor pe lekol dan segonder dan lakaz avek *boyfriend*, avek bann zonm ki bokou, bokou pli vye ki zot.

E sa i bann pratik ki annandler bann paran i bezwen pran responsabilite. Sanmenm sa kot ou war dan sa lakour kot ou pe soutir sa zonm, i annan lezot zanfan pli zenn ankor.

So, i annan bokou bann ka ki pe arive ozordi dan nou sosyete, kot nou le met blanm lo sosyal. Nou kapab met blanm lo Lasanble Nasyonal. Nou kapab met blanm lo Minister Sosyal.

Be selman nou konman paran, nou bezwen pran nou responsabilite kot i konsern nou zanfan. Nou pa kapab zis met blanm lo lezot kan nou konman paran nou bezwen veye. Nou bezwen pran nou responsabilite lo lafason ki nou elve; lo lafason ki nou *raise* nou zanfan. I nou responsabilite Mr Speaker.

So, Mr Speaker, ozordi i sagrinan ki sa bann keksoz i reel dan nou sosyete. Nou bezwen aksepte. Nou bezwen *deal* avek e nou bezwen rod en solisyon pour nou redwir ka labi kont zanfan dan nou sosyete.

E ozordi mon ... mon parol menm parey ki Mosyon pe demande, anmennen par nou koleg Onorab Bijoux. Mon osi senpatiz avek bann viktim.

Parey mon'n dir, dan lepase mwan mon en dimoun ki'n travay bokou lannen dan *field* Sosyal, dan sosyete sivil konman en *social worker*, konman en *counsellor*. E dan bann program dan lekol, dan ledikasyon Mr Speaker.

E mon'n war bokou. Mon en dimoun ki'n zwenn e koz e angaz avek plizyer bann zenn

ki'n pas dan bann tou form labi. E mon konpran zot soufrans. I pa en keksoz fasil. I afekte zot devlopman. I pran bokou letan pou tir sa sikatris pou bliye, pou *move forward*.

E alor mon senpatiz avek sa bann viktim. E i pa lafen. Zot annan sipor. Zot annan soutyen bann Manm Lasanble Nasyonal. Zot annan soutyen lakominote. E nou la pour nou protez zot, pour nou sipor zot, pour nou ankouraz zot. Pour nou ed zot pou *move on* pour zot sirmont sa defi, sa trazed ki zot in pas ladan.

E osi Mr Speaker, mon pa pou kapab konklir mon entervansyon san remersye bann travayer Sosyal. I pa en louvraz fasil. Annandler ler zot ganny rapor ki i annan bann ka labi ouswa bann ka labi fizik, labi seksyel. Ler zot al kot sa bann lakour. Annandler zot fer fas avek tou sort kalite ostilite. Agresyon annandler.

I annan paran ki dan *denial* e alor zot azir dan en bann fason en pti pe agresiv. E mon konnen i pa fasil pour zot. Me zot annan nou soutyen. Zot annan sipor Lasanble. Zot annan sipor Sesel an zeneral e nou pou donn zot sa sipor.

Sirtou, nou pe espere avek bokou pasyans pour sa Lalwa, pour sa *Model Law* vin devan nou Lasanble Nasyonal

pour nou *deal* avek bann *sexual offences*.

So avek sa 2 mo Mr Speaker, mon pou sipor sa Mosyon ki devan nou. E mon konnen nou pou ganny sipor inanimite pour nou – pour sa Mosyon anmennen par nou koleg Onorab Bijoux. Avek sa 2 mo, mon dir ou mersi Mr Speaker.

**(APPLAUSE)**

### **MR DEPUTY SPEAKER**

Mersi Onorab. Prosen enterven an ki lo lalis se Onorab Larsen.

### **HON CECILE LARSEN**

Mersi Mr Speaker. Bonzour a tous. Spesyalman zabitan Au Cap a lekout.

Labi zanf an dan nou pei i en sityasyon ki pe vin pli grav zour an zour. E sa pa sa Sesel ki sa pep ti ganny promet. E pour sa, sa Lasanble pa devret reste silans.

Koman en paran, mon met gran lenportans lo lanmour, sipor ek ledikasyon dan lavi mon zanf an e osi zanf an dan mon bann pros. Mon angaze pou ed zot devlope e vin bann endividi responsab.

Mon met lanfaz lo sa demann ki pe fer avek bann agreser; “Reviz zot konportman”. Non, pa reviz zot konportman. Me plito, aret fer ditor bann zanf an.

Mazin si ou ki ti sa zanfán, eski ou ti pou kontan en adilt pe fer sa avek ou? Mon ti a kontan lans en lapel avek bann paran pou edik zot zanfán lo lafason zot servi telefónn.

Bokou fwa i annan ki vin viktim letan zot angaze avek bann adilt e anvoy bann portre, e fer bann *video*. Kot apre bann abizer i servi sa kont zot konman en menas pou sali zot repitasyon pou fer zot reste silans.

Konportman adilt osi i kree en lenpak lo nou bann zanfán ek zenn. I tris ler ou vwar ban zenn kot zot portre e *video* i ganny sirkile e zot form par en kominote sa bann zenn.

Ek Sesel ki pti kot nou konn kanmarad e pa byen pour nou vwar nou bann zanfán ek zenn pe ganny trennen dan bann sirkonstans parey. Zot pa met zis zot a risk, me bann pli pti dan menm lanvironnman pou fasilman vin *target* bann abizer.

Labi zanfán i en fleo ki afekte lavi e lavenir bann ki pli feb e vilnerab dan nou sosyete. I kree lanvironnman ranpli avek latrises e konfizyon. Mon debout for kont tou form labi zanfán; fizik, mantal, seksyel e negligans.

Mon oule vwar en sosyete kot zanfán i ganny proteze e respekte. Kot mezir enportan i ganny met an plas pou anpes

labi. Nou bezwen en Lalwa pli strik kont bann abizer. En ledikasyon pli for e sipor pli solid pour bann viktim.

Mon krwar ki nou bezwen adres lakoz fondamantal labi zanfán. Fodre nou get pli lwen ki lo sirfas. Nou bezwen al dan rasin sa problem. Ki bann diferan faktè ki anmenn ver labi zanfán?

Lakour ki pa fonksyonnen byen. Problem drog e labi lezot sibstans. Lapovrete e mank responsabilite par bann adilt. E par adres lakoz fondamantal, nou pou kapab donn zanfán en lavwa ki tann zot.

Akoz personelman, mon anvi vwar en sistenm kot tou zanfán i ganny tande. Mon anvi vwar en sosyete kot bann adilt pa per koz lo sa size. Kot nou pa kasyet sa problem anba tapi pou protez repitasyon person.

I kler ki i bezwen annan plis bann striktir sipor ki al anver bann paran e lakominote pou promouvwar ledikasyon e savwar viv, ki ava anpes bann tel aksyon parey.

I devret annan plis sansibilizasyon e aksyon pou asire ki napa okenn zanfán ki soufer an silans. Fodre nou vin pli vizilan pour nou kapab idantifye bann sinye e sanzman dan konportman zanfán.

Fodre nou edik nou zanfàn ki pa fodre per pou koz ek paran lo okenn size. Mon ti a kontan vwar en sosyete ki pa toler labi zanfàn ditou e ki fer tou sa ki posib pou protez bann ki pli vilnerab. Ansanm nou kapab fer en diferans.

Alors se sakenn de nou konman paran, ser, frer, tantin, tonton, granmanman, granpapa e osi dan lakominote e tou dimoun an zeneral, nou annan sa responsabilite pou asire ki zanfàn i grandi dan en lanvironnman kot i an sekirite e ranpli avek lanmour.

Mon ti a kontan pran sa loportinite pou remersye tou bann endividi konsènen ; tel ki Manm Lafors Lapolis, travayer Sosyal, bann ansenyan e osi bann ki antase ek bann NGOs ki pret en zorey pou ekoute e ki port soutyen bann viktim.

I pa fasil pou ekout sa kalite soufrans toulezour. Me zot pa les lebra tonbe. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab. Onorab Arissol, ou prosen Manm.

**HON SANDY ARISSOL**

Mersi Mr Speaker. Bonzour tou dimoun. Tou bann Manm ki a lekout. Bonzour tou bann zanfàn e tou bann lazans ki

travay avek bann zanfàn an relasyon avek Mosyon ki'n ganny prezante devan nou.

Mr Speaker, mon anvi premyerman letan mon konmanse, dir en mersi spesyal pour tou bann dimoun; endividi, lasosyasyon, bann NGOs, bann lazans, departman Gouvènmàn ki fer en travay nob zisteman avek nou bann zanfàn la deor.

E i annan sa *saying* ki Onorab Sathya Naidu in koz lo la. Se, “i pran en kominote pou elve en zanfàn”. E mon mazin en sa *saying* li i bezwen date en bon pe lannen pase.

Me souvandfwa mon asize mon demann mon lekor konman en papa; eski sa *saying* ozordi i ankor relevan dan sa *monde* ki nou viv 2025? Akoz mon dir sa?

Sa letan, letan sa *saying* ti ganny entrodwi; i, “nou bezwen en kominote pou elve en zanfàn” nou ti annan en kominote.

E dan nou kominote sa letan, ou ti annan bann pret. Ou ti annan sanniter. Ou ti annan zofisye lapolis. Ou ti annan ou ansenyan. Ou ti annan tou lezot dimoun. E enkli fanmir.

Fanmir sa letan ti konpri gran paran, tonton, tantin, frer, ser. E vwazen sa letan ti ganny konsidere konman en fanmir, parske vwazen ou ti

kapab dormi laport ouver. E vwazen toultan ti zet en koudey lo ou lakour.

Vwazen letan i koup son rezim bannann, i vini i donn ou en lanmen bannann. Ou letan ou plant en pye mayok ou donn li en bout mayok. E vwazen ti zet en koudey lo nou zanfán.

Eski ozordi sa menm kominote nou kapab dir i ede dan elve en zanfán, ozordi ler nou pe koze? I kapab wi. I kapab non. Be i en kestyón ki toultan mon demann mon lekor. Mon a eksplik ankor.

Ozordi si ou vwar en zanfán, en endividi pe fer en aksyon ki pa devret, eski ou kapab dir li, parey dan nou sosyete 25 an, 30 an pase? Non, pa posib.

Eski ou kapab apros en paran ozordi pour ou dir ek li son zanfán ti pe fer tel keksoz, tel zour, tel ler? Non, Mr Speaker. I pa parey sa sosyete ki ti kontribye pou elve en zanfán 35 an pase.

Tou keksoz in sanze ozordi. E se pour sa rezon mon demann sa kestyón; si sa *saying* ozordi i ankor egzaktèman parey son vre lefe 25 an, 30 an, 40 an, 50 an pase Mr Speaker?

Me lot kestyón ki mon kontan demann mon lekor an relasyon avek Mosyon anmennen par Onorab Bijoux, eski paran i devret ganny

blanmen letan enn son zanfán i ganny abize? Larepons i kapab wi. Larepons i kapab non. Akòz mon dir wi i devret ganny blanmen?

Si li konman en paran li menm li i neglig son zanfán, i pa donn latansyon son zanfán. I pa konnen kote son zanfán i ete. I pa konnen ki son zanfán pe fer. Alor dan en kote nou kapab dir wi, i responsab.

Me de lot kote nou kapab dir non. Sa paran pa devret ganny blanmen si son zanfán i ganny abize. Akòz Mr Speaker? Mon ava eksplike.

Parske souvandfwa, en paran i konfyè en manm fanmir. I konfyè en adilt ki i konnen, ki i kontan. Parey son *partner* ki i viv avek. Oubyen en gran tonton, en gran tantin, en paren, en marenn, se sa bann dimoun ki i konfyè son zanfán avek.

Me ozordi *trend* i montre nou Mr Speaker, poudir se sanmenm sa bann dimoun dan sa serk ki nou kontan. Ki nou konnen. Ki nou viv avek. Se zot souvandfwa ki nou war zot aparet Ankour letan i annan en labi kont en pti zanfán. Alor, eski paran i devret ganny blanmen letan son zanfán i ganny abize?

Mr Speaker, Tribinal Lafanmir. Eski ozordi letan nou pe koze, 2 *partner* in separe, kekfwá akòz sa

manman i santi poudir sa papa i abiz son zanfan.

Pa neseserman seksyelman. Me kekfw a i negliz son zanfan. I abiz son zanfan verbalman par bann parol ki i pe dir. E sa i kapab mars lo tou le de kote. Si sa lot *partner* i dan sibstans, alor zot annan en separasyon.

Me Tribinal dan son kapasite avek son Lalwa i fer ki i bezwen asire ki zanfan li i ganny sans viv ek tou lede *conjoint*. Menm zot in separe.

Alor, eski parfw a Tribinal i fer zistis sa zanfan letan zanfan i retourn kot sa lot *partner* pour wikenn - aköz Lakour in donn sa lord. Tribinal in donn sa lord pour li al fer wikenn.

Me laba menm laba kot i al fer wikenn, se pour sa rezon lot *partner* ti arete, parske se bann labi ki ti arive an relasyon avek sa zanfan, e sa kitans in arive.

Eski Lakour ozordi letan nou pe koze an relasyon avek labi zanfan, pe ede dan sa travay pou sov sa bann zanfan?

Eski par egzanp bann ka labi pa devret ganny presedans Ankour konpare avek en lot ka, parske i en kliyan zanfan. Sa i bann refleksyon ki nou, nou kapab fer oubyen bann endividi fer.

Eski pa souvandfw a *case* i tro tarde pou ekoute? E

zanfan i konmans fatige, i per, parske ou pe demann li menm kestyon. E tousala Mr Speaker, i bann refleksyon ki nou konman en pti pei dan en *monde* transformen, modernize, nou, nou devret pe fer sa bann refleksyon an relasyon avek labi zanfan.

Be Mr Speaker, letan nou, nou ti a pe grandi, toultan nou rapel ti annan bann parol ki nou bann granmoun ti dir; “lenz sal i lav antre fanmir”.

Souvandfw a letan en zanfan i ganny abize, son paran i kanmi, zot onte. Alors souvandfw a annan bann zanfan ki zot soufer dan silans, parske son papa, son manman pa oule ki sa i al deor.

Dimoun pou koz lo la. Dimoun pou riy nou. Ki dimoun pou dir lo nou? E sa zanfan li i soufer dan silans aköz lenz sal pa sipoze lav kot lorloz. Me i sipoze lav antre nou fanmir e nou zaksyon i reste antre nou.

Lontan granmoun i dir ek ou i annan dimoun i plant son zironmon i manz li menm. Aköz Mr Speaker? Parske nou ti annan nou bann papa – nou ti apel sa bann vera lafanmir lontan - granmoun i apel sa bann vera lafanmir parske se zot ki ti fer sa dezord dan bann fanmir.

Parey mon'n dir taler, se zot ki ti pli pre. Se zot ki konn mouvman sa zanfàn. Se zot ki vwar li toulezour. Alor zot, zot ti fer plante. E granmoun i dir ek ou se zot menm zot ki ti manz zot zironmon.

Granmoun ti servi bann term parey rangonden. Rangonden se letan nou viv parmi fanmir e nou viv lanmenm, nou reste e nou fer tou keksoz ansanm.

So tousala Mr Speaker, se bann term, se bann pwennvi, se bann lopinyon ki'n egziste depi ki bann labi in konmanse. Me ozordi Mosyon pe koz lo labi zanfàn. En keksoz ki pa gou pour nou koz lo la. Napa en topik pli pa enteresan pou koz lo la.

Be selman mon'n anvi fer resorti detrwa pwen, parske mon osi konman en papa ki annan mon Jayden dan lakour, ki mon pa pou oule personnn poz lanmen lo li.

Alor i osi mon devwar pour mwan fer sir mon pa poz lanmen lo okenn zanfàn dimoun, Mr Speaker. E sel keksoz ki annan pour nou dir se ki nou paran nou bezwen pran nou responsabilite. Paran, nou bezwen pran nou responsabilite.

Konman Lasanble nou kapab donn plizyer legzanp nou. Kote paran i kit nou zanfàn? Akòz sa zanfàn in ganny abize? Akòz i annan

telefonn? Akòz i annan *internet*?

Nou konman Lasanble nou kapab dir tousala. Me tou paran endividelman Mr Speaker, zot konn zot prop sironstans lavi.

Si i pe kit son zanfàn avek en tantin. Kekfwa i napa lot landrwa pour li kit son zanfàn. Si parfwa souvandfwa in ganny sans kit en pti kou son zanfàn dan lakaz tousel pour li al aste en keksoz magazen, i son sironstans a sa moman letan.

Nou konman Lasanble nou pa kapab pe montre ledwa oubyen pe ziz sa. Parske sak dimoun i viv dapre son sironstans lavi.

Alor sa ki nou bezwen dir selman ek tou dimoun, enkli mwan menm. Nou bezwen a tou moman pe asire ki nou zanfàn i dan son konfor e sekirite letan nou konman paran nou pe rod lavi pou anmenn pour li dan lakour.

Mr Speaker, me par kont nou bezwen osi apresye dan sa travay ki tou dimoun i fer an relasyon ek nou zanfàn. Nou annan bann NGOs la deor ki kapab donn en koudmen.

Kot bann lekol nou annan bann *school counsellors*. Nou annan bann *teachers* zot menm zot ki zwe en rol paran letan nou, nou al travay. E tousala nou bezwen apresye e rekonnet travay ki

zot fer Mr Speaker, pour nou bann zanfan.

Me, i annan zis en sel keksoz dan lavi parfwa ki nou, nou pa fer konman paran, se ekout nou zanfan. Parfwa konman i vini; dadi tel keksoz, tel mannyer. Ah, la ou konnen mon fatigue la. Al fer en keksoz, taler nou ava koz en kou. E toutan nou fer sa en fwa, nou fer li 2 fwa, nou fer li 3 fwa, katriyenm fwa, sa labi i reste avek li.

I anvi dir mwan li, depi premye zour. I annan en dimoun pe tous mwan malapropo. I annan en dimoun pe anvoy mwan mesaz. Mon toutan konman paran, nou, nou rod en leskiz. Nou fatigue. Mon pe al kwi manze. Mon pe al anmas lenz. Mon pe al en pti kou magazen. Me li sa zanfan i pa pou dir ou ankor.

Sel pti konsey; nou bezwen ekout nou zanfan. Fatige, tar, i annan en keksoz i pe dir nou. Si i pa dir ek ou, i pou al dir ek en dimoun dan semen. Se tou Mr Speaker. Napa enn ant nou isi Sesel oubyen dan lemonn la anndan ki parfe.

Me parfwa nou rod bann pti detay. Nou osi nou bezwen led dan diferan fason ki mannyer nou, nou kapab soulaz nou zanfan. Me parfwa i bann pti detay. Ekoute. Ekoute ki i pe al dir ou. Ekoute

ki i anvi dir ou. Akoz i anvi dir ou sa parol. Se tou Mr Speaker.

Mon krwar Mosyon in vin en bon moman letan e Mosyon pe eksprim sok ek lakoler. I en keksoz ki nou'n viv avek pour plizyer lannen. Me parey mon dir, mwan mon pa kapab blanm personn an relasyon avek sa.

Mon pa pou kapab blanm okenn lazans. Pa pou kapab blanm Sosyal pa pe fer ase louvraz. Pa pou kapab blanm Minis akoz i pa pe met lanmen lo dosye. Mon pa pou kapab blanm personn Mr Speaker. Me mon ankouraze letan mon vwar tou bann dimoun i koste ansanm pour nou protez nou zanfan.

I annan bann retar ki arive dan diferan seksyon; dan diferan sekter. Me nou konman en pti pei nou bezwen vin ansanm pour nou rode ki mannyer nou kree sa *shield* pou protez nou zanfan, parske se zot ki pilye nou sosyete e nou ki bezwen protez zot. Napa personn ki pou protez zot Mr Speaker.

Labi i vin dan diferan form. Parey nou tou nou konnen, i annan labi moral, labi neglizans, labi verbal kot souvandfwa ou pe dekrir li dan diferan fason. Ou pe dekrir li konman en nigo. Ou pe dekrir li konman en naryen fer. Ou pe dekrir li konman en pye

bannann ki ou ti kapab plante e ganny en rezim. E li sa zanfann i akimil tousala li.

Prezan demen zour i annan son problem, i pa pou vin ankor kot ou li. I al koz sa avek en etranze. Ler i koz ek en etranze, se la kot telefonn i rantre, se la kot larzan i rantre. Parske i servi son pti les-pri pour li ganny *bribed* akòz i krwar i pe ganny en sipor e labi i antre. Setou Mr Speaker ki mon anvi dir mwan.

Nou paran nou bezwen ekout nou zanfann. Ekout nou zanfann. Se tou ki zanfann i demande, parske nou, nou bezwen asire ki nou zanfann zot kontinyen enjoy sa lavi zanfann.

Nou tou alors en zour ler nou vin adilt nou dir; zot, plito nou ti ankor zanfann. Akòz? Kot nou Manman nou ti ganny tou keksoz. Ou leve ou dite in fer ; ou liniform in drese, manze in fini kwi. Toulezour ou annan en pti larzan dan ou lanmen pour ou ganny en *ice-cake*, pour ou ganny en samousa.

Me ler ou vin adilt, ou antre dan en lot soulye. Prezan ki ou santi kwa ki mon papa ek mon manman tou sa letan ti a pe sakrifye pour mwan konman sa zanfann sa letan.

E se pour sa rezon Mr Speaker, mwan ozordi konman mon ankor vivan, toultan mon onor mon papa ek

mon manman ki ankor la. E mon *grateful* pour tou sa ki zot in fer pour mwan ek mon bann ser ek mon bann frer. Se parske ler mwan mon'n vin adilt ki mon'n konpran ki sakrifis zot, zot ti fer pour mwan ler mon ti en zanfann.

Se pour sa rezon mon osi ozordi mon pe fer tou mon mye pour mwan *secure*, protez e donn mon zanfann tou sa ki zot devret gannye pour zot vin en adilt, pour zot kapab zot osi partaz sa avek sa bann zenerasyon Arissol ki nou ekspekte ganny en bon pe a lavenir Mr Speaker, avek sa 4 ki la, la.

Alor Mr Speaker, mon anvi dir avek Onorab Bijoux mon pe donn li *full* sipor pour son Mosyon. I en Mosyon ki en pe difisil an term santiman. Be selman nou bezwen osi anvoy en mesaz kler pour bann dimoun laba deor.

Ozordi parey nou dir, losean i gran. Losean i gran. Pa reste lo koray zanfann. Me al en pe pli lwen laba deor. Les nou bann zanfann trankil. Les zot grandi. Les zot epanouir e les zot *enjoy* zot lavi zanfann ziska zot osi zot a vin en adilt. Parske zot viv avek en sikatris pour leres zot lavi. E sa i pa normal Mr Speaker.

Alor Mr Speaker, ankor enn fwa, mon ava terminen an dizan ki mwan mon siport tou travay ki bann lazans pe fer ek

tou zanfán. Parske se zot ki dan sa soulye. Zot ki konnen ki zot *deal* avek. E mon annan en sipor spesyal pou bann zanfán pou zot kontinyen vin devan. Pa kasyet. Pa per.

E mon dernyen mesaz se pour bann paran, enkli mwan menm, se pour nou ekout nou zanfán. Ekout nou zanfán. Ekout nou zanfán! Mersi bokou Mr Speaker.

**(APPLAUSE)**

**MR DEPUTY SPEAKER**

Mersi Onorab. Dernyen entervenan lo sa lalis avan nou pran *right of reply*, Onorab Monthy?

**HON PHILIP MONTHY**

Mersi Mr Speaker. Mosyon anmennen par Onorab Bijoux i enn ki annan en lenportans imans. Pour le senp rezon Mr Speaker, ki i pe adres en size ki devret pe tous nou tou profondeman. Sirtou ler ou get la anndan dan sa Lasanble, kot mazorite nou i bann paran.

E ler ou en paran, mon asire ki nou tou nou pou dakor ki okenn labi, okenn soufrans ki en zanfán i pas ladan, nou vwar li konmsi ou a krwar sa ki pe arive ek sa zanfán i a pe ariv avek nou prop zanfán. Ou santi li plis.

Sa i fer Mr Speaker, ki nou tou nou bezwen, e mon

pou menm dir ki i en lobligasyon pour nou la dan sa Lasanble ki bann *Leaders'*, pour nou la dan sa Lasanble ki bann paran, pou fer nou par pou ede protez linosans nou bann zanfán. E fer sir ki sa bann abizer i ganny demaske e *deal* avek dan en fason pli sever posib.

E la ozordi Mr Speaker, ler nou pe koz lo sa Mosyon, mon pou pas lo en kominike lapolis ki mon'n vwar lo rezo sosyal yer, ki pe demann nenport endividi ki konnen oubyen annan lenformasyon kredib lo kote en fiy 12 an sorti lo Vilaz Prezidan Port Glauud pou kontakte okenn Stasyon Lapolis.

Sa fiy Mr Speaker, ti dernyen ganny vwar Vandredi swar le 30 May 2025 lo Vilaz Prezidan. E anba lanons lapolis ki nou vwar souvan sa, i rapel manm piblik ki i en lofans anba Lalwa pou abrit en zanfán miner kot zot lakour, san konsantman legal kot ou menm kapab ganny prosekite devan Lakour. E mon pou repet sa bout - kot ou menm kapab ganny prosekite devan Lakour.

Selman Mr Speaker, tou dabor mon pou dir mon pa pe met an kestyon travay ki lapolis pe fer. E travay ki servis sosyal pe fer. Mon pou profite, mon pou remersye zot pour sa travay nob ki zot pe

fer. E mon konnen i pa sitan fasil.

E mon konnen ki i annan plizyer zot bann zofisye dan sa bann lazans ki pe fer zot mye pou protez nou bann zanfan. E pour sa parey Onorab Arissol in fer. Lezot in fer avan mwan. Mon pou dir zot en gran mersi Mr Speaker.

Me kot nou kapab fer pli byen, nou bezwen touzour double nou zefor pour ki nou vremen kapab fer sa diferans. E la dan sa sityasyon ki bann tel sityasyon ki nou vwar ariv souvan, kestyon ki touzour ganny demande se; ki arive avek sa bann adilt ki pe abrit sa bann zanfan kot zot lakour san konsantman legal?

Eski in deza annan ki'n fer fas ek lazistis pour bann tel lofans? Lo sa kote Mr Speaker, mon santi ki sa bann Lalwa ki deza an egzistans i bezwen morde. E tou bann lazans konsernen i devret pe asire ki zot fer zot bout pour ki Lalwa i aplike e aksyon legal i ganny pran kont sa bann tel endividi.

E ler nou pe koz lo bann provizyon legal Mr Speaker, i enportan pour nou pran konesans lo kwa sa bann provizyon ki annan. E osi kote ki nou kapab amelyore.

Nou vwar *Domestic Violence Act 2020* ki fer provizyon lo ki mannyer konplent i ganny fayle. Ki swa par sa zanfan li menm.

Oubyen dan lenstans kot sa zanfan pa kapab, sa i kapab ganny fer par Direkter Servis Sosyal. Oubyen lezot endividi oubyen lenstitisyon konsernen.

Nou vwar i annan provizyon lo prezans paran pandan proses *interview* avek lapolis. E dan lenstans kot sa bann paran zot menm ki bann abizer, i annan provizyon lo lekel ki ranplas sa paran dan sa proses avek lapolis.

*Protection Orders* kot laplikasyon i kapab ganny fer pou protez sa zanfan kont vyolans domestik e kont sa bann abizer ki souvan i sa bann menm dimoun ki sipoze pe protez sa zanfan.

Nou annan *Children's Act* ki kouver proteksyon zanfan dan en fason pli global. Lobligasyon pou donn bann swen nesaser en zanfan, parey nouritir, aki adekwat, lenz, lozman, lasante e proteksyon kont okenn danze.

Proteksyon zanfan ki'n ganny abandonnen oubyen ki orfelen. En pe parey sa ka la ki mon fek lir Mr Speaker, lo Vilaz Prezidan. Nou annan Kod Penal. Fer provizyon pou protez zanfan kont labi seksyel.

Me kantmenm ki pa nesaserman fer provizyon pour ki i annan en proteksyon total kont tou form labi ki

kapab ganny kategorize konman labi seksyel.

E sa i parey Mr Speaker, en legzanp; *sexual grooming*. Ki ler en adilt pe ofer en zanfan serten byen materyel pour en lobzektif pirman seksyel, i pa ganny kouver. Kominikasyon endesan i osi pa ganny kouver anba Kod Penal.

E in osi ganny fer remarke ki i annan serten nivo *bias*. Mon mazine Onorab Labonte in koz en pti bout lo la, kot serten lofans i ganny kouver si i ariv avek en fiy. Me i pa forseman leka si sa menm lofans i ganny komet kont en garson.

Parey mon'n dir o konmansman Mr Speaker, e ki'n ganny fer resorti par detruwa entervenman ki'n pran laparol, se nesesite pour ki sa *Sexual Offences Bill* i vin devan nou Lasanble dan en fitir ase pros.

Sa i a fer ki bann lofans seksyel ki an se moman pa pe ganny kouver anba Kod Penal, oubyen par lezot lezislasyon ki an plas. Sa i ava ganny pran kont dan sa *Bill* ki ava vin devan nou Lasanble.

Mr Speaker, kot proteksyon nou zanfan i konsernen, nou tou la anndan konman bann *Leaders*, menm si nou bann politisyen, nou devret pe koz en sel langaz. E i pa devret annan okenn politik ler nou pe koz byennet e

proteksyon linosans nou bann zanfan.

Mon pou remersye Onorab Bijoux ki en nouvo *MNA* la dan Lasanble. Me ki kantmenm i en dimoun nouvo, in annan sa lasazes pour li vin avek en tel Mosyon Mr Speaker.

En Mosyon ki telman enportan ki mon pou demann tou bann Manm, tou bann *Leaders* la anndan pou donn zot sipor. E pou anvoy en mesaz kler la deor avek tou bann abizer;

Ki nou pou debout for kont zot e nou pou fer sir ki bann labi ki zot pe fer oubyen ki zot pe mazine fer kont nou bann zanfan. O tan ki posibil, nou pou fer nou mye pour nou kapab fer sir ki zot ganny fer fas avek lazistis.

E avan mon terminen, i annan en keksoz ki enn de fwa mon'n dir ler servis sosyal i vin dan Lasanble. Mon'n deza dir ek *PS* ki zot, zot Polisi i kont.

An terminan mon pou touzour ensiste ki non bann abizer seksyel i ganny pibliye, Mr Speaker. Akoz en dimoun ler i komet en vol, i komet en lot lofans, i ganny kondannen, nou pas son – nou montre son figir lo televizyon, nou nonm son non? Me bann abizer seksyel nou, nou pa konnen lekel zot.

Mon konnen ki rezon ki par deryer sa ki servis sosyal i

donnen. Me mon krwar in ariv  
ler pour nou revwar sa e pou  
fer sir ki tou dimoun i konnen  
lekel zot. E en dimoun avan i  
mazin al dan en tel laliny, i ava  
mazin 2 fwa si sa bann keksoz  
i ganny fer Mr Speaker.

Avek sa detrwa mo mon  
pou akord tou mon sipor  
Mosyon Onorab Bijoux. I en  
Mosyon tre enportan e mon  
pou demann tou lezot koleg isi  
dan sa Lasanble pou fer parey  
Mr Speaker. Mersi.

**(APPLAUSE)**

### **MR DEPUTY SPEAKER**

Mersi Onorab. Onorab Monthy  
ti dernyen entervenans ki ti'n  
endike i le koze lo sa Mosyon  
ki devan nou. Donk in ariv ler  
pour nou pran *droit de réponse*  
loter Mosyon Onorab Bijoux.

E mon a zis rapel Onorab  
Bijoux ki yer ti annan en  
propozisyon lo size mo reviz  
vizavi arete ki mon prezimen  
ou ava adrese dan ou  
larepons. Mersi.

### **HON GERARD BIJOUX**

Mersi Mr Speaker. Bonzour  
tou Manm Onorab. Bonzour  
tou bann dimoun ki pe swiv  
nou.

Pou vin en pti pe lo  
repons ki mon'n gannye yer,  
nou vwar ki sa size i en size tre  
enportan e bokou dimoun,  
menm deor i a pe koz lo la. Ki  
fer ki nou'n ganny en bon deba

e mon apresye tou bann  
keksoz ki'n ganny dir dan  
Lasanble par tou le de kote  
latab. E mon a remersi zot  
pour sa.

Lo ki konsern en pti  
amannman ki Onorab Vidot ti  
anvi fer. Kot i dir mwan pou tir  
sa bout 'revize', met 'arete'. Wi,  
sa bout arete i *ok*. Me selman  
mon pou kit mon Mosyon  
parey i ete akoz ler mon'n  
mazin sa mo revize, parey nou  
tou nou'n koz lo la, i  
plizoumwen en *mindset*.

Onorab Aglae, mon  
krwar in koz en pti pe lo la.  
Bann *mindset* bann dimoun ki  
souvan i vin bann abizer.

Alors mwan mon pe dir  
zot reviz en pe zot *mindset*. Sa  
maladi ki zot annan. E pour  
zot reviz sa, zot bezwen  
lasistans. E lasistans i annan.  
Alors, rod lasistans pour zot  
kapab pa al antre dan sa bann  
aksyon.

Mon pou kontinyen Mr  
Speaker, par parey mon'n dir.  
Mon remersi tou nou bann  
Manm Onorab ki'n koze.  
Entervansyon lo sa Mosyon.  
Nou tou nou'n dakor ki sa size  
i tre sansib, ki bokou pa oule  
koz lo la.

Parey mon koleg Onorab  
la o bor mwan in dir - Onorab  
Arissol. Labi zanfann i en  
soufrans ki nou pa kapab  
inyore. Alors, nou tou annou  
fer li konman en konversasyon

kot nou rod tou byennet sa zanafan.

I pa zis sa zanafan osi. Annou mazin osi sa abizer. Sa bann keksoz ki'n pas ladan. E annou ed zot. Tou lede kote i bezwen led. Bann viktim i bezwen nou senpati osi. Alors, annou koste.

Bann lazans ; bann lenstitisyon, Gouvernman, nou menm nou Lasanble. Annou fer nou mye pour nou kapab protez nou bann zanafan. Nou'n dekrir diferan ka labi lo bann zanafan. Nou kominote. Nou pei - eskize.

Nou'n dekrir diferan form labi e tou i en douler lo sa zanafan, nou kominote e nou pei. Alors, mon dakor avek zot ki nou tou nou devret donn en koudmen. Depi Gouvernman parey mon'n dir. Bann lenstitisyon. Bann lazans. Bann *Leaders* dan kominote e kominote li menm pou bezwen zwenn ansanm pou protez nou bann zanafan.

Enn de bann Onorab in refer lo responsabilite paran pou regard byen kote ki nou kit nou zanafan. I vre par ler nou konman paran nou bezwen kit nou zanafan aköz nou bezwen al travay.

Nou bezwen swa – parey sirtou bann paran ki travay lotel aswar. Bann manman tousel. Nou bezwen en landrwa pou kit nou zanafan, nou anmenn swa kot en

paran, kot nou bann gran paran. Tonton e tantin.

Be, an menm tan letan nou pe fer sa nou bezwen fer sir ki nou gete lekel sa bann dimoun ki frekant sa landrwa kot nou kit nou zanafan. I byen nou konnen.

Akoz nou konnen avek nou problem sibstans, drog, lalkol i kapab enterfer dan sa landrwa kot nou pe kit nou zanafan. E se la kot nou zanafan i ganny abize. Alors, annou regard en pti pe dan sa direksyon.

In ganny fer sorti ki menm zanafan osi i abiz zanafan. Wi, nou'n tandé. Nou vwar kot menm marmay lekol antre zot, zot abiz kanmarad fizikman e seksyelman. E par ler sa bann keksoz i ganny toufe. Parey Onorab Sandy Arissol in dir; nou lav li antre nou. Nou pa al pli lwen avek.

Me sa i en konsern. I en konsern ki konmans vin en pe efreyan. Ler nou war lo rezo sosyal bann marmay lekol pe lager antre zot. Sa i osi i en form labi aköz i en form *bullying*, kot nou war enn pli feb nou sot lo la an group, nou konmans bate. Apre ki arive? Napa okenn ka ki ganny mete kont sa bann zanafan.

Lemonn teknolozi osi parey i ganny fer sorti i enn bann keksoz ki pe ogmant en pti pe sa bann ka kot keksoz i ganny delivre par *text* lo

telefonn. Sa osi i en form labi. Kot bann adilt pe anvoy mesaz pour bann pti fiy, bann pti garson par servi telefonn mobil. Alors, mon demann bann paran osi, annou regard en pti pe byen ki pe pase letan nou donn zanfann en telefonn.

Mon pa pou al tro bokou dan bann largiman ki'n pase. Mon war ki nou tou nou'n dakor avek sa sityasyon. E parey Onorab *Leader* Lopoziyon in anmenn devan. E menm mon bann koleg. Kot i konsern sa Lalwa lo – manner i apele sa Lalwa? Mon'n met li la.

*Sexual Offence Bill* ki'n ganny met devan pour en pe letan. E mon krwar in ler pour nou, Gouvernman konsidere anmenn devan pour nou kapab ganny en konversasyon lo la kot nou kapab amann bann lezot Lalwa ki koz en pti pe lo bann labi zanfann.

Mon krwar sa i esansyel. Akoz yer swar mon'n asize mon'n regard en pti pe dan sa *Bill*. Mon vwar i annan bokou keksoz kot nou kapab met devan, ki kapab *deter* en pti pe sa bann aksyon ki pe arive.

E pou pa al tro lwen Mr Speaker. Parey mon'n dir, mon pa pou al gran dan mon bann larepons, akoz nou tou nou'n koz an faver sa Mosyon. E ki mon krwar mon pou ganny sipor tou lede kote latab.

Be parey mon pe dir, nou kapab anmenn bann rekomandasyon. Parey ki sa *Sexual Offence Bill* i bezwen vin dan Lasanble Nasyonal pli vit ki posib, pour ki nou a kapab fer en deba lo la. Lalwa i merit pli for pour bann tel labi.

En lot rekomandasyon, ki bann dimoun dan kominote, bann ki annan lekspertiz. Vini, vin zwenn ansanm pour nou kapab ed nou bann zanfann. Swa nou edik zot en pti pe lo sa size labi, e sipor bann viktim labi bann zanfann, e osi travay avek bann abizer pou ed zot sanz sa bann move pratik.

E mon dernyen rekomandasyon parey Onorab Sandy Arissol in dir, paran, pran letan pou ekout nou bann zanfann. Akoz nou bann zanfann i bezwen zot. I annan keksoz pou dir zot. Alors, annou ekout zot pour ki nou a kapab dekouver ki pe arive dan lavi sa bann zanfann.

Mr Speaker, mon pou aret la e mon a demann tou bann Manm pou sipor mon Mosyon, pour ki nou a kapab anvoy en mesaz for deor pour bann abizer pou arete abiz nou bann zanfann. Mersi.

**(APPLAUSE)**

**MR DEPUTY SPEAKER**

Mersi Onorab. Donk, in ariv ler aprezan pour nou pran en *vote* lo Mosyon ki devan nou. I premye Mosyon ki lo *Order Paper* pour sa semenn.

Avan nou pran *vote*, dan lentere piblik ki a lekout mon ava zis repas lo Mosyon ki nou pou pran *vote* lo la.

“Sa Lasanble i eksprim sok avek lakoler vizavi logmantasyon dan labi zanfani ki pe ogmante dan Sesel e pe demann bann agreser pou reviz zot konportman. Sa Lasanble i osi senpatiz avek tou bann viktim e siport tou lazans konsernen ki pe travay pou lit kont sa sikatris dan nou sosyete”.

Donk mon ava demann tou bann Manm ki an faver pou endike silvouple? Mersi. Eski i annan okenn Manm ki kont? Mersi.

Donk, Mosyon parey mon'n fek lir, rezilta *vote* i koumsa. I annan 30 Manm ki'n *vote* an faver. Napa *vote* kont. Napa abstansyon. I fer alor ki sa *vote* in pas par linanimite.

**(APPLAUSE)**

#### **MR DEPUTY SPEAKER**

Donk, mon ava remersi zot pour zot partisipasyon e nou pou *adjourn* la. Nou pou rebran travay 11er pour kontinyasyon bann *item* lo nou *Order Paper* ki en lot

Mosyon e dan non Manm Elekte pour distrik Grand Anse, Mahe. Donk, nou ava *adjourn* e nou ava rezwenn 11er.

**(BREAK)**

#### **MR DEPUTY SPEAKER**

*Welcome back* tou dimoun. Nou pou kontinyen avek bann *item* lo nou *Order Paper* pour sa Merkrede. E prosen *item* i Mosyon limero 2 ki dan non Manm Elekte pour distrik Grand Anse, Mahe.

Donk, mon ava envit Onorab William pou prezant son Mosyon. Nou a ganny segonnman avan ki nou pas lo lentrodiksyon Mosyon. Onorab?

#### **HON WAVEN WILLIAM**

Mersi Mr Speaker. Bonzour tou dimoun ki a lekout. Mr Speaker, Mosyon i lir konm swivan;

“Lasanble i demann tou bann lazans ki form Lotorite *Planning* pou revwar zot lapros ver laprouvasyon plan lenfrastruktir, prenan kont defi sanzman klima”.

#### **MR DEPUTY SPEAKER**

Mersi Onorab. Nou ava ganny segonnman pour Mosyon. Onorab Bistoquet?

#### **HON ANNE BISTOQUET**

Mersi Mr Speaker. Bonzour Mr Speaker, tou koleg Onorab e tou dimoun a lekout. Mosyon i ganny segonde.

### **MR DEPUTY SPEAKER**

Mersi Onorab. Donk, mon ava envit loter Mosyon pou fer son lentrodiksyon. Mersi.

### **HON WAVEN WILLIAM**

Mersi Mr Speaker. Mr Speaker, permet mwan fer sa 2 ou 3 komantr swivan avan ki mon al lo mon prezantasyon.

Premyerman, mon ti a kontan ki bann Departman Lotorite *Planning* par vwar lentervansyon lo sa Mosyon koman nou pe fer en *bashing* sa lazans vizavi bann deba ki nou pou fer lo sa Mosyon.

E Mr Speaker, mon anvi remersi Bondye pou beni nou ek en zoli pei. Mon remersi li pour son gidans e proteksyon fas ek en stabilite mondyal dan tou son laspe. Mon remersi tou sitwayen ki pe priye pour nou pei.

Finalman, mon anvi dir ki nou Seselwa nou annan sitan bokou pou dir mersi letan ou konpar nou ek lezot pei. Sesel ozordi i *the talk of the globe for a global forum* koman en Pti Leta Zil ki pe *lead* lo plizyer baromet. Enkli kontribisyon kont size sanzman klima, adaptasyon e mitigasyon.

Mon sezi sa lokazyon pou ankouraz e felisit Departman Sanzman Klima e tou Seselwa ki pe partisip dan *meeting* e lezot *forum* enternasyonal lo non Sesel.

E tandan nou natir vilnerabilite, nou bezwen reste proaktiv Mr Speaker, parey lentansyon par deryer sa Mosyon.

Mr Speaker, sa Mosyon pour nou pei koman en Pti Leta Zil i tre enportan ki koman reprezantan Lepep, nou koz lo sa size souvan dan tou son dimansyon ek bi pour enn; sansibiliz sitwayen lo sa fenomenn. E son lenpak global. E potansyel lenpak lo nou pei.

Dezyenmman; pou enfliyans aksyon ver pran bann diferan nivo responsabilite endividyel ouswa kolektiv.

Mosyon pe demann tou bann lazans ki form parti Lotorite *Planning* pou revwar zot lapros ver laprouvasyon plan lenfrastruktir.

Mr Speaker, letan nou koz lo defi sanzman klima an relasyon ek kalite teren kot devlopman lenfrastruktir i konsernen. Ozordi *global*, sa mo “soutenabilite” i *the buzzword* dan tou plan devlopman.

Mr Speaker, Lotorite *Planning* Sesel son manda se pou administre zesyon later

dan Sesel atraver en kad konpreansiv parey dekrir dan Lalwa *Physical Planning* 2021 e lezot regilasyon ki enkli *zoning*, plan zesyon later e regilasyon ki gouvern devlopman landrwa rezidansyel, lagrikiltir, endistriyel e komersyal pou asir devlopman dan lord efisyan e soutenab.

Mr Speaker, Lotorite *Planning* an term zesyon later an relasyon ek sanzman klima, apard ki Lalwa *Physical Planning*, zot annan bann diferan gid ki pe servi pou enplimant faz plan stratezik zesyon later e devlopman ver 2040. I en dokiman Polisi Miltisektoryal.

Vizyon enkliziv devlopman en nasyon fyer dan lazwa e an bonn sante ek en lekonomi rezilyan, e en lanvironnman sen pou atir lenvestisman lanplwa e en pei ki gou viv ladan.

Sa Polisi i koz lo ki mannyer pou adres defi sanzman klima. Tel parey ki Gouvernman pou siport mezir adaptasyon. Ki vedir asir loportinite opsyon plan soutenab kont zesyon linondasyon e proteksyon labita, e lespes i ganny promote.

Idantifikasyon bann devlopman stratezik pou protez kont lenpak dezans natirel tel parey deboulir later,

linondasyon, lerozyon lakot e tanpet.

Asire ki lenfrastruktir ki enkli semen nou stok batiman an egzistan e nouvo batiman, zot ganny proteze. Asir ki zot pli rezilyan ek lenpak sanzman klima.

Enkorpor en standar o apropro lefikasite e devlop nouvo sours delo soutenab. Mr Speaker, vizyon Gouvernman e misyon Lotorite *Planning* i kler. I montre ki zot pe tenir kont sa bann defi sanzman klima.

Mr Speaker, manm ki form parti Lotorite *Planning* i Lanvironnman, Lasante, Piblik, Departman Transpor, Minister Lakaz e Later - 5 Manm dan prive zot asiz lo sa *Board* ki enkli zot *Chairman*.

Mr Speaker, mon remerisi Bondye toulezour pou eparnye nou kont bann gro kalamite asosye ek sanzman klima ki nou trouve dan nouvel aletranze pe arive atraver lemonn.

A gran parti, se imen ki responsab pour sanzman dan klima. Akoz pandan ki diferan kad devlopman pe ganny fer, sa balans ant proteksyon ver laspe negativite aksyon devlopman, in ganny neglize.

Latansyon in plis lo ki nivo benefis nou kapab tire dan en fason pozitiv e oubliy net lenpak negativ. Lemonn ki dan en lakours devlopman san

larbitraz pour plizyer sek ozordi pe pey le konsekans.

E ozordi lemonn pe rekonnet fot e pe sey pran bann mezir endividyel e kolektif pou adres defi resofman later e son bann reperkisyon lo limanite.

Mr Speaker, Sesel par son natir ki vilnerab dan bokou laspe ek defi sanzman klima, i enportan ki tou sitwayen ki konsyan i azir inifye pou ranforsi rezilyans nenport landrwa ki nou ete.

Mr Speaker, 195 pei ki manm Nasyon-z-Ini zot in ratifye Lakor *Paris* lo sanzman Klima, enkli Sesel. Lakor *Paris* ti vin anfors le 4 Novanm 2016. Dan sa Lagreman parti konsernen ti tonm dakor ki zot gard tanperatir lemonn par anba 2 degre *celsius* par lao nivo *industrial*.

Me, al de lavan ek en lespli pli anbisye pou sey gard li par anba 1.5 degre ki sipoze redwir bann risk e lenpak sanzman klima konpare ek 2 degre.

Mr Speaker, depi ki Lagreman ti'n vin anfors, parmi bann diferan komikman e promes fer par bann pei devlope e endistriyalize ki osi manm Nasyon-z-Ini bann promes sonm larzan mezir e zefor kolektif.

Sa bann target e promes, mazorite pa'n ganny zwenn. Bann pei devlope e anba

devlopman, zot pa'n zwenn. Sesel parmi bann pti pei Leta Zil ki pa pe polye parey bann pei endistriyalize pe fer fas ek plizyer defi.

Sesel atraver gidans Prezidan brans Egzekitif, brans Lezislatif e Zidisyer, zot pe touzour met a latansyon lemonn konsern Sesel e demann pour sipor.

Mr Speaker, rapor *IPCC* in endike ki sa *limit* agree lo tanperatir global in fini depas 1.5 degre lannen pase. E ti'n ariv 1.55 e ki pe kontinyelman monte Mr Speaker, anyel. Nivo lanmer Sesel pe monte par 3 a 5 milimet, aköz resofman later ki pe ogmant bann glasyer pol nor pe fonn plis. Ki vadir plis volim delo pe menas bann *zone* kotyer.

Pour Sesel a longer ditan, nou konsyan ki lefe pou annan lo bann plizyer devlopman lo lakot. Enkli dan bann montanny ek sanzman an fason ki lapli pe tonbe ozordi. E koupir pye dibwa e preparasyon teren pour devlopman.

Nou pe eksperyans en gran varyasyon dan patern lapli, kouran e divan global. E Sesel pa pe ganny eparnye Mr Speaker. Stratezi Lotorite *Planning* i konpri osi protez lenfrastriktir ki an egzistan e nouvo, pou pran bann mezir aksyon ki devlopman lenfrastriktir i ganny fer ek en

konsyans konpreansiv lanvironnman e klima.

Mr Speaker, serten legzanp ki mon kapab donner ki demontre ki fason nou pe ganny afekte se defi ki serten nou bann *zone land bank* ozordi pe fer fas avek par lefe ki sa lenpak sanzman klima pa ti en size dan vokabiler lavi sitwayen.

Ozordi sa leokri global e sanzman dan nou lanvironnman klima pe ogmant latansyon e konsern. Ou dekouver ki bann teren ki'n ganny divize an morso e lakaz ganny fer kot i annan larivyer delo ki pas anba fondasyon lakaz. E delo ki swiv – bann glasi ozordi, pe vin pli vizib otour bann propriyete.

Zot pe menas lenfrastriktir depi lakaz, miray e servis piblik. Koupir bann pye dibwa san en plan rebwazman pe *expose* later pour lerozyon. E *expose* plis imen ek lasaler an ekse.

Mank ase resers lo teren e negligans dan fer serten travay konstriksyon byen in koute. Menm pran serten lavi atraver dega lenpak Mr Speaker.

Mank bann lenfrastriktir rigol dan bann *estate* pe koz bokou problemm ozordi e pe fer vwazen fase ek vwazen. Kalite semen ki pe ganny trase e konstrir dan serten landrwa

montanny ozordi, pe menas lavi e propriyete.

Adopte en standar koleksyon desarz lakwizin, lasanmben e twalet Mr Speaker, ozordi i pe vin en konsern. E polisyon Mr Speaker, si nou pa veye, i pou vremen afekte nou en kantite.

Mon rekonnet sa eleman mank resours. Me kot i konsern prezerv lavi e lenvestisman personnel, i enportan e bann gen Leta. Mon demande ki Gouvernman i konsider met an mars bann diferan *scheme* pou siport demars sitwayen ki anvi amelyor son lavi e konfor, fas a bann defi sanzman klima.

Mr Speaker, mon pou aret la aköz mon asire ki lezot Manm Onorab zot annan ankor bokou pou dir e kontribye lo sa Mosyon. Mon anvi ki Manm i anrisir sa deba kot popilasyon a ganny edifye e vin pli konsyan zot desizyon e aksyon ki lenpak sa pe kapab kree dan nou lanvironnman.

Mon demande ki Manm Onorab, ki koz lo sa Mosyon zot fer zistis sa size ki nou piblik deor zot vin pli konsyan e revwar zot konportman e fason fer. Ki ansanm konman en nasyon, nou ava pe sofgard nou patrimwann, ranforsi rezilyans e finalman konsolid sa nivo soutenabilite. Mr Speaker, *I beg to move*. Mersi.

**MR DEPUTY SPEAKER**

Mersi Onorab William. E mon swete bann Manm ki pou entervenir lo sa mosyon in antann bann dernyen parol ki Onorab in dir.

Ziska prezan i annan 4 Manm ki'n endike poudir zot oule koze. Mon ti ava demann bann lezot Manm ki le koze, endik mwan silvouple letan Onorab Hoareau pe koze. Koumsa pour mwan konnen ki mannyer mon pou *manage* letan. Mersi.

Onorab Hoareau, *proceed*. Lezot Manm ki le koze letan ou, ou pe koze, endik mwan la silvouple lekel ki le koze ankor. Mersi bokou.

**HON JOHN HOAREAU**

Mersi Mr Speaker. Bonzour Mr Speaker. Bonzour tou dimoun ki a lekout. Bonzour tou Manm Parlman.

Sa size sanzman klima i enn ki enteres mwan bokou. E dabor, avan mon konmanse mon le remersi Prezidan aktyel e bann Prezidan ki'n pas avan. Mon le remersi bann NGOs. E mon le remersi osi Onorab Wavel William e Onorab Sandy Arissol ki reprezant nou en pti pe konman Anbasader lo sa size sanzman klima dan bann *world forum*.

Tou sa bann dimoun, enkli bann NGOs parey mon pe dir, in zwe en rol enportan

ki sa size sanzman klima in vin en size ki ganny adrese globalman. E size Sesel konman en pei ki vilnerab avek sanzman klima, i osi ganny pozisyonnen dan en fason tre for.

Mr Speaker, i annan si oule 2 *schools of thought* lo sa size sanzman klima. I annan en group dimoun ki panse ki i en sirk natirel ki later i pas atraver sanzman klima, resofman, apre re rafresi.

E i annan en – aköz dan lepase later li menm in eksperyans 5 letan kot in ariv bann *ice ages*. E dernyen *ice age* i anviron 11500 a 11700 lannen pase.

Si i en fenomenn natirel, petet i kapab osi *at the moment* pe ganny akselere pare serten aksyon imen. Aköz? Syantis in dekouver ki bann letan *preindustrial*, avan ti annan revolisyon endistriyel. Ti annan apepre 280 *parts per million carbon dioxide* dan ler.

Me sa, in ogmante pou fer ariv ziske 426.55 *parts per million* dan ler. Sa logmantasyon li menm in ed pou fer resofman later. E pour bokou dimoun ki petet sa mo resofman later i kapab en keksoz, en konsep ki zot pa tro, tro konpran - resofman later i arive ler i annan tro *bokou carbon dioxide* – dyoksid karbonn dan ler, ki vin parey en *blanket*. Kot ler lasaler

soley i rantre dan latmosfer, i pa kapab resorti pou retourn dan lespas. I pa kapab *bounce back* parey nou dir. E se sa ki fer ki *global temperature* i ogmante.

E parey loter Mosyon in dir, ozordizour in ariv 1.55 degre an plis ki *preindustrial times*. Me si sa i ogmante par lao 2 degre, i pou annan konsekans grav lo plannet later.

Konsekans grav ki nou pe panse ki pou arive se ki bann glasyer pou fonn plis ankò e pou annan - nivo lanmer pou monte. Pou annan plis evaporasyon, pou annan plis move letan, pou annan plis fenomenn siklonn, glisman teren koze par gro lapli. Inondasyon partou dan bann landrwa plat e bann lakot.

Mr Speaker, sa i en kote zistwar. Me lot kote zistwar se laseres, dife lafore, mank delo dan serten parti lemonn. Lenpak ki pou annan lo lagrikiltir kot petet nou pa pou kapab prodwi sa lakantite manze ki nou sipoze pou nourri bann pep. Dezertifikasyon. Blansisman (blansisaz) koray, akòz plis asidifikasyon dan lanmer. Ler karbonn dyoksid i ganny akimile dan delosale i fer ki delosale i vin pli *acidic*. E sa i afekte bann koray. E sirtou, i pou afekte Lendistri

Lapes. I bann keksoz ki pou tap nou plenman.

E ozordi, sa size sanzman klima pe ganny gete konman en size sekirite nasyonal. Akòz i afekte ou sekirite lasante. Ler i annan plis delo partou, plis moustik i afekte ou sekirite manze, parey mon'n dir, ou pa kapab prodwi plis manze.

E i fer osi ki i annan migrasyon dan ou pei. Dimoun pa pou reste kot i annan inondasyon e dimoun pou tant pou mont pli o. Oubyen dimoun menm pou kapab sorti dan bann landrwa kotyer e al reste dan lezot pei kot nivo lanmer pa afekte.

E parey nou konnen poudir isi Sesel nou'n ganny *blessed* avek bann zoli zil – bann zoli zil koralyenn ki zot nivo – petet si nivo delo i mont par lao 1 met, nou pou war poudir zot pou fasilman ganny inonde.

Mr Speaker, loter Mosyon pe met lanfaz lo devlopman ki ler i arive ki *Planning* e bann lezot lotorite konsernen i fer sir ki sa bann size mitigasyon pou anpes *flooding* petet antre, oubyen pou anpes glisman teren, bann keksoz koumsa, sa bann keksoz i ganny pran kont e nou fer sir ki bann devlopman i vin bann devlopman dirab ki dimoun pa pe zis perdi larzan. Pei pa pe zis perdi larzan.

E mon'n ganny sans vizit Île Platte e serten lezot zil koralyenn dan travay ki nou'n fer dan FSSD. Se Komite ki get devlopman soutenab. E nou'n vwar ki par egzanp Île Platte, bann lotel in ganny konstrir apepre 1 met par lao sirfas, sa ki nou apel *ground level*.

E sa set aköz ankör pou *mitigate* bann size sanzman klima e linondasyon. Alor i annan bokou keksoz ki pe deza ganny fer par Lotorite *Planning*. Me nou, nou ti ava kontan ki sa size i ganny trete a en pli gran lanpler.

Savedir ki Lotorite *Planning* i kapab fer ankör plis pou kapab fer sir ki sa bann fenomenn ki pe arive, parey linondasyon, glisman teren, ensidswit, ki pa afekte lavi e osi pa afekte nou lekonomi.

Aküz byensir i en problem lekonomi ler ou pe depans larzan e sa larzan pa pe – konman ou dir sa? Sa devlopman pa soutenab e sa devlopman i ganny arete pour sa bann rezon ki nou'n nonmen.

A *mon avis* mon krwar poudir i pa zis en problem *Planning*, e Lotorite *Planning*. I en problem ki en pe *cross ministerial* si ou le. E Departman Lanvironnman li menm, Seksyon Sanzman Klima, Departman Lenerzi, tousala i annan bokou pou fer avek. Aköz si nou pe gete,

rezon fondamantal ki kōz resofman later se aköz nou pe bril bokou plis *petroleum fuel*, ki fer ki karbonn dyoksid i antre dan ler.

Mr Speaker, mon sa ki mon konstate se ki i devret annan serten Polisi Nasyonal ki kover tou sa bann size lo kote konstriksyon. Par egzanp, ozordizour nou vwar serten biro Gouvernman ki pe pran linisyativ pou met fotovoltaiik lo la.

E fotovoltaiik i fer ki i annan en rediksyon dan servi *fossil fuel* pou brile pour ki i prodwi elektrisite. Alor, sa i *offset* pour sa elektrisite ki ganny prodwi par *fossil fuel*. E osi i fer ki ler ou pa pe bril otan *fossil fuel*, i annan mwens emisyon karbonn dyoksid dan ler.

Mr Speaker, bann keksoz koumsa i pa devret zis aplik pour bann *building* Gouvernman. Me i devret osi repantir lo – dan en fason en pe global lo nou pei kot si sakenn de nou i fer serten zefor pou met en pe plis fotovoltaiik lo nou lakour, lo nou lakaz, e sa i a ede dan en fason pour nou kapab ariv lo sa stratezi 15poursan lenerzi renouvlab par lannen 2030. E 50poursan lenerzi renouvlab par 2050.

Me osi, mon konsyan ki PUC i bezwen fer serten travay lo son rezo nasyonal pou fer

sir ki i kapab abzorbe sa bann elektrisite an plis ki ganny prodwi par fotovoltaike. E ki pa annan sa ki nou apel *grid fluctuation*.

Kot i annan en letan kot i annan en o voltaz letan i desann. Alor, i bezwen annan bann sistenm ki kapab *rectify* si ou le, sa bann kantite prodiksyon lenerji ki antre lo *grid* nasyonal.

E sa mon konnen i pou kout larzan pou kapab met bann transformer ki ou bezwen. E osi petet bann *central batteries* ki kapab abzorbe sa bann lenerji e larg li dousman, dousman ler i annan sa nesesite. Tousala i bann keksoz ki nou bezwen fer si nou bezwen *move towards* nou *target* 50 pousan par 2050.

Mr Speaker, anliny ek sa, i annan size *water harvesting*. I annan par egzamp, proteksyon pour nou bann landrwa – akòz nou pei li menm i en pei montannye. E si nou pa protez nou bann landrwa montannye pou protez nou sours delo. Nou pou vwar ki sa osi i pou vin en problem pou nou. E sa osi i ganny atribye avek *disturbance* sa *natural water cycle* ki anpese ki i annan sa lakantite evaporasyon. Lakantite lapli i vin parey son sirk natirel.

So, si nou pe koup tro bokou pye dibwa, nou pe detri

tro bokou nou lafore, sa osi i pou annan serten lenpak lo sa zafer sanzman klima.

Alor i en keksoz ki en pti pe divers. En pti pe partou, partou. Me redwir konsonpsyon osi i en size ki devret ganny trete konman en Polisi Nasyonal. Ki fason nou kapab fer sa? Se ki nou *design* lakaz li menm i devret bann *design* en pti pe parey bann sistenm tradisyonnel.

Parske avan, ti napa *air condition* dan lepok nou bann vye paran. Alor, ki fason nou lakaz ti ganny konstrir ti permet ki i annan sirkilasyon ler. Menm bann plans ki ti ganny mete dan lakaz, ti ede pou kapab annan sa sirkilasyon ler ki sorti anba lakaz li menm. Lakaz ti lo en serten oter.

E sa bann keksoz koumsa nou bezwen gete ki mannyer nou kapab amelyor lo la e fer sir ki sa bann kalite *design* i ganny *encompassed* dan nou larsitektir modern.

Sa i ava ede ki nou redwir premyerman lo lakantite elektrisite ki nou servi pou konsonmen pour *aircon* avek *fan*. Litalizasyon osi, bann keksoz parey *LED* i devret annan serten – *LED lights* i devret annan serten protokol, ki fer ki sa bann lalimyer i vin pli bon marse posib ki nou kapab ranplas li, dan plas servi bann *halogens* oubyen

bann lezot lalimyer. Bann *sodium vapour lights* plito. Bann ki sofe.

Mr Speaker, mon'n koz en pti pe lo sa bann keksoz. E osi proteksyon nou lakot. Petet bann *seawalls*. Nou devret war li en pe plis partou, partou. Nou pa devret pe konble osi bann lanmar.

E nou devret osi pe planifye byen lo kote ki landrwa nou plas bann lakaz. Nou pa plas li lo bann lateras. Ki en fason sa bann lakaz i zis degrengole ler i annan gro lapli.

Alors, sa bann keksoz koumsa i bezwen ganny *encompassed* dan nou bann plan, bann desen, bann striktir, bann *design planning*,

ki fer ki *the leading role* i devret konmans par *Planning Authority* ki pou donn bann ransennyman. Fer bann *workshop* pour bann dimoun ki *design*, pour bann dimoun ki fer sa bann plan *building* ki zot kapab met sa dan zot travay, e fer sir ki nou kapab vwar en amelyorasyon dan lilizasyon lenerzi. Swa nou redwir. Swa nou servi li pli efektiv.

Osi lo size teknolozi, i bezwen annan nouvo teknolozi ki antre ki *environmentally friendly*. Mon krwar poudir i napa ase, aköz i napa sitan sa swaf, sa demann - sa *impetus* si ou le. Sa lafors pou diriz sa

bann kalite teknolozi dan nou pei.

Alor fodre nou get li dan en fason global. Fodre i annan bann komite ki pe asize, ki pe regard sa bann size sanzman klima e kapab entegre li dan nou devlopman.

Akoz, parey mon'n dir, i en size sekirite nasyonal. I en size ki afekte tou bann diferan sekirite manze. Sekirite parey mon'n dir – sekirite manze, sekirite lasante, e sekirite lozman, ensidswit.

So, sa i kapab menm fer ki i annan konfli entern si nou pa kapab adres sa bann *issues* dan lefitir. Alor i bann keksoz ki Gouvernman i devret pran kont e *Planning* osi i devret pran kont.

Loter Mosyon in nonm en pe bann *schemes*. E mon konnen poudir i annan serten *schemes* an plas ki ed nou avek en pti *loan* pou kapab sanz ou bann *appliances* pou pran bann ki *consume* en pe mwens elektrisite.

Me an frans verite, sa bann keksoz pa tou dimoun ki akse avek aköz pa tou dimoun ki konnen ki fason i ganny deroule. E i devret annan plis sa ledikasyon. I devret annan plis sa *drive* lo nivo nasyonal pou fer sir ki sa bann keksoz i vin en keksoz ki *accessible* avek laplipar dimoun dan nou pei.

Mr Speaker, lo kote lagrikiltir petet nou devret war en pe plis bann *eco agriculture*. Nou devret war plis *verticulture*. Enn de bann keksoz ki bann fason inovatif mannyer pou plante, kot nou pa koup bokou pye dibwa e nou gard nou lanvironnman an kondisyon pli byen posibil pou nou zenerasyon demen.

Mr Speaker, parey mon'n dir, mon remersye ankor tou sa bann dimoun dan nou pei ki pe *drive* sa size sanzman klima e pe met li a laporte lemonn pou fer lemonn realize poudir, se nou bann pti pei ki toutan vin vilnerab avek sa bann keksoz.

Akoz nou annan en serten kantite nou zil ki bann *low lying islands* e ki kapab ganny menase direkteman. E sa i pou afekte nou tourizm, aköz i annan bokou nou bann lotel lo sa bann *outer islands*. E i pou osi afekte nou lekonomi e nou prop legzistans konman en pep.

Alor Mr Speaker, mon swe se ki bann lotorite ki pe ekout nou ozordi, i pran sa size en pe pli serye e i pran sa size pou met li o sant devlopman, o sant tou bann deba ki annan pou fer avek devlopman e fason ki nou devlope. Avek sa Mr Speaker, mon a remersye ou.

#### **MR DEPUTY SPEAKER**

Mersi, Onorab Hoareau. Mon ava envit Onorab Roucou aprezan pou pran laparol.

#### **HON MICHEL ROUCOU**

Mersi Mr Speaker. Bonzour tou dimoun ki pe ekout nou. Spesyalman zabitan Mont Fleuri. Mr Speaker, Mosyon anmennen par Onorab William ozordi ki in met devan nou Lasanble i lir koumsa;

“Lasanble i demann tou bann lazans ki form Lotorite *Planning* pou revwar zot lapros ver laprouvasyon plan lenfrastruktir, prenan kont defi sanzman klima.”

Mr Speaker, ozordi ler ou pe get nou pei Sesel li menm li, sa Pti Leta Zil ki nou, nou annan, nou pa pe ganny eparnye avek defi sanzman klima ozordi ki pe arive dan lemonn antye.

2004 in prouve avek *tsunami* li menm li. Apre bann lannen ki'n swiv apre kot nou'n war avek gro lapli ki'n tonbe bann degradasyon partou dan diferan distrik. Menm mon distrik Corgat Estate ti pas dan en serten *flooding* detrwa lannen pase. Kot nou ti war kot sa ti afekte en group zabitan dan mon distrik.

Mr Speaker, ozordi ler ou pe get Sesel li menm li, avek bann devlopman ki pe annan, fason konstrir bann lakaz li menm li i modernize.

Oparavan ler ou ti pas partou dan bann kanton ou ti war bann dimoun plim vomye pe servi tol pour zot fer zot lakaz.

Ozordi keksoz in sanze. I annan diferan kalite metod ki bann dimoun pe vin avek. Spesyalman konmela ou war dimoun pe servi *prefab. Cement board* li menm li. Blok. E sa ou konnen poudir se ki avek lespas teren ozordi, pe fer ki bann pli gran fanmir zot pe sey zot fason pou zot kapab servi sa pti bout later ki zot annan pour zot kapab konstrir zot *maison* lo la.

E ozordi pour ou batir ou lakour definitivman ou bezwen atraver en dimoun pou fer ou plan. E sa dimoun li ler i fini fer sa plan, i pas atraver Lotorite *Planning*. Kot la *Planning* i monte i verifye. I get teren li menm li pour li kapab donn ou, ou laprouvasyon e gete.

Akoz definitivman, si ou teren – i depan ki fason i ete. I annan bann lezot keksoz ki petet ou pa ti pe mazin lo la. Ou bezwen fer li. Premyerman se ki *Planning* i kapab dir ou, ou bezwen met en miray pou ede pou sekiriz ou lakour li menm li, ouswa ou vwazen.

E osi konmela en nouvo metod ki nou pe war Mr Speaker, se ki konmela bokou dimoun ler zot fer zot lakour zot kontan met beton, met en

pti *tiles* swa lo lakaz li menm li. Deor.

Kot dimoun – kot ozordi nou war avek sa bann metod koumsa. Espesyalman bann dimoun ki dan leo. Nou war poudir delo, later li menm li i pa pe bwat sa delo aköz tou delo i tant pou desann anba.

E ozordi Sesel nou annan en gro problem drenaz li menm li. Swa ki mannyer dan lepase Lotorite *Planning* ti fonksyonnen. E ozordi nou war avek devlopman ki'n arive. Zis konparezon mon pou dir ou si ou pou mont Foret Noire li menm li. Lo kote grander bann drenaz, i pa ideal pour sa *volume* delo li menm li ki pe desann. E sa i tant pou afekte bann lakour.

E ozordi pli gro problem se ki ler en dimoun pe al fer son devlopman, ou bezwen fer sir poudir ou annan provizyon sistenm *sewage*. E nou war poudir sa i enn parmi bann pli gro lakoz ozordi ki bokou dimoun pa pe ganny laprouvasyon atraver *Planning* pour zot kapab fer serten devlopman. Akoz definitivman *Planning* pou demann ou premye keksoz, se ki kote ou pou plas ou sistenm *sewage*. Ki sa i vin en defi pour bokou fanmir.

Mr Speaker, ozordi Sesel li menm li nou pa kapab dir poudir nou en pei ki pe elwanny nou avek bokou bann

keksoz, bann devlopman ki nou war deor dan bann larestan pei. Ozordi i annan bokou dimoun pe koz lo sa vas lasaler li menm li.

E osi lo kote lanmer mont ki pe kontinyelman arive. E Sesel nou war sa dan plizyer sirkonstans. Ler nou pou pas Port Glaud, ou pou war ler ou pe pase lo semen. Lo kote Au Cap osi tou i annan sa *issue*. Ek larestan landrwa kot nou war degradasyon lans.

E osi mon pa pou kapab manke pour mwan dir zis en legzanp tipik, i annan L'île Au Cerf ki en pti zil lanmenm la o bor nou Mahe, ki tonm dan distrik Mont Fleuri.

E zot osi laba nou war plizyer fwa zabitan. Nou'n fer plizyer *meeting* avek lotorite konsernen pour nou sey rod en mannyer pou kapab sov nou bann lans ki baze L'île au Cerf. E mon mazine Ste Anne osi pa pe ganny eparnye avek sa. Ek bann larestan zil.

Be selman, i toultan annan solisyon. I toultan annan solisyon. Malgre pour sey anpese ki sa i afekte plis bann zabitan nenport ki rezyon, kot nou bezwen Lotorite *Planning*.

E mwan mon krwar avek lapros ki Onorab William pe demande kot Lotorite *Planning* li menm li pour li revwar en pti pe ki fason pour nou kapab gid

nou bann zabitan. Gid nou pep.

Zis parey konmela ki nou war Mr Speaker, nou war ki bokou dimoun i konmans fer lakaz lo pilye li menm li. E souvandfwa si ou pas dan distrik Port Glaud kot mon annan mazorite mon bann fanmir laba.

Espesyalman dan sou distrik Foret Noire, Port Glaud, nou vwar mazorite bann lakaz i ganny fer lo pilye. E sa bout devan li menm li kot lakwizin, sa bout i tant pou son fondasyon i ater. E sa bout deryer ki plizoumwenn i sa bout dibwa. Li i ganny mete lo en serten oter.

E mwan mon pa se poudir avek bann *issues* ki konmela nou war. Mazorite dimoun ozordi menm dan bann *flat*, ki nou war Mr Speaker. Si *tiles* in ganny mete, nou war bokou dimoun pe eksperyans sa *issue* kot *tiles* pe zis leve dan bann lakaz.

E sa i en keksoz, i en fenomenn ki pa bokou dimoun i kapab eksplike aköz ki sa pe arive. E i annan plizyer laköz ki'n sey vin avek. Me selman mon panse i devret annan en letid a profon pou konnen aköz ki sa pe arive. E petet lo kote teren li menm li kot lakaz in ganny fer, petet i en landrwa kot i annan serten sours delo pe pase. Sa pe

afekte. Petet i enn bann opsyon ki sa pe arrive.

Be selman mon krwar nou devret revwar en pti pe bann lapros. Espesyalman bann dimoun ki pe reste dan bann landrwa kot i en landrwa aki annan bann sours delo. E souvandfwa, i annan en serten zistans ki *Planning* i donn ou pour ou kapab *build* en devlopman o bor larivyer.

E sa osi tou i en keksoz ki mon panse poudir avek limitasyon, ek later ki ozordi pe napa sitan bokou. Mon krwar i annan en serten travay ki *Planning* i devret vwar la pou gete ki mannyer nou kapab dan en pli bon fason, pour nou ed bann fanmir ki petet zot propriyete i baliz avek serten larivyer.

Nou pa pe dir konstrir dan larivyer. Zis petet mon mazine poudir lo kote sa zafer zistans li menm li, vwar en pti pe. Selman avek serten gidans ki nou bann profesyonnel i ava donner.

E osi Mr Speaker, en keksoz ki nou bezwen pran kont se ki ozordi nou war poudir bokou dimoun ozordi kot zot propriyete zot pe plito koup bokou bann pye dibwa ki otour zot propriyete.

Mon ganny en konpran poudir sa i kapab en danze pour zot pour zot lakour li menm li. Be selman, mon panse poudir i annan sa

travay ki ti pe ganny fer par serten lazans. Ouswa Gouvernman li menm li.

Kot pe dir ek dimoun poudir nou bezwen *once* ki nou koup en pye dibwa, nou bezwen plante. Pour nou fer sir ki nou kit nou zil li menm li, i annan sa laverti li menm li. E fer sir ki – aköz pye dibwa i vreman enportan an term lo kote bann zafer ki annan pou fer ek lanvironnman.

E mon panse avek bann pwen ki loter Mosyon in anmennen. E osi mon mazine avek modernizasyon dan bann fason fer keksoz, mon mazine poudir petet *Planning* li i annan serten travay ki i bezwen pe fer, ouswa ki deza pe ganny fer ouswa in fini fer.

Ki zot a bezwen vin devan pou dir avek Lepep li menm li ki zot, zot pe vwar pour le fitir. E ki mannyer lapros ki zot, zot anvi vin avek.

Akoz nou pa pou kapab konman en pei nek kontinyen konble partou Mr Speaker. Aköz sa definitivman pour nou fer reklanmasyon, i pou annan en lenpak parey in dir. Aköz nou war poudir bokou bann pli gran pei spesyalman kot i annan pei kot i annan lanez, *ice* li menm li ki pe fonn an gran kantite. E sa pe vin afekte bann Pti Leta Zil.

Ki aprezan nou – nou, nou bezwen war nou, nou lo

*alert* e pe rod en fason ki mannyer nou osi nou pou *safeguard* nou balizaz, nou pei li menm li.

Akoz dan le fitir, ki mannyer bann syantis in dir, pou annan bokou bann pti zil ki i riske disparet. I riske disparet. Mon pa konn lo kote nou Sesel ki zistans nou ete lo la. Be selman, nou pa pe ganny eparnye avek bann keksoz ki pe arive partou dan lemonn.

Mr Speaker, mon panse poudir se ki sa Mosyon anmennen par Onorab William i en keksoz ki nou bezwen pran li serye, aköz mon krwar nou devret pe konmans reakte la.

Nou devret konmans reakte avek bann devlopman ki annan. Ozordi, nou popilasyon pe monte e bokou dimoun ozordi pe rod lozman. Bokou bann fanmir pe rode. E nou bezwen vwar ki fason nou pou fer.

Nou'n war poudir Minister pour Later ek Lakaz in vin avek diferan solisyon, alternativ li menm li pou sey ed bann paran pour zot donn zot zanfän. Ouswa pou fer li vertikal, orizontal, ki mannyer zot apel li, kot sa i ava ede pou tir en pti pe sa presyon an term lo kote dimoun ki pe rod en lozman pour zot.

Be selman avek bann travay ki *Planning* i ava fer dan

sa domenn, e osi mon krwar poudir *PUC*. *PUC* pou bezwen annan en gran rol la, aköz zot pou bezwen vwar - zot pou bezwen vwar bann lezot metod.

Akoz parey zot konnen poudir bann sistenm ozordi *sewage* li menm li, i annan bann serten landrwa ki pa pe arive, ki i annan en bezwen ozordi. E zot pou bezwen vwar—

Parey si ou pou pas kan *Tobruk* ou pou war i annan en nouvo sistenm *sewage* ki'n ganny enstale. E sa pe deservi sa *housing estate*, aköz li i pa pe kapab ganny akse avek *the main sewage line* ki i tonm anba dan Mont Fleuri santral anba.

E mwan mon panse poudir avek bann travay – e ozordi Gouvernman i annan en plan pour li konstrir bokou plis lakaz. E mazorite fwa, pli gro problem dan bann *housing estate* oubyen bann landrwa kot bann *housing estate* in ganny fer, se problem *sewage* li menm li.

E mon panse avek sa lapros ki *PMC* pe pran la avek lenfrastruktir pour zot enstal bann nouvo sistenm *sewage* la. Mon krwar i apel *Fe Rock* (*Eco Rock*) en zafer koumsa. Pour zot kapab ede pou tir en pti pe sa problem. Aköz nou war avek lakantite *volume* lapli ki pe tonbe konmela, i bokou

plis. E zis en demi zournen lapli i tonbe, ozordi i *flood* partou. I kapab menm fer dezas, lateras grennen, *so on*.

So mon panse poudir avek en travay ki nou, nou Lasanble nou ava met bann propozisyon devan. Nou, nou napa leksperyans dan sa domenn. Mwan mon napa. Mon pa'n deza travay dan *Planning*.

Me selman mon konnen poudir avek lekspertiz bann dimoun ki dan sa domenn la, zot a kapab donn en gidans en pti pe pli byen Gouvernman. Kot pou gete ki mannyer bann devlopman i kapab vini, pour le fitir avek sanzman klima.

Espesyalman bann dimoun ki annan plan pour zot kapab batir zot lakour ouswa bann lotorite ki avan fer semen partou. Kot sa pou benefisye nou zabitan.

Kot i ava evite ki sa dimoun ki'n pran son pti *loan* pour li fer son lakaz kot i war li dan en sityasyon apre ki in fini fer son lakaz, kot i pe ganny afekte avek bann keksoz parey lapli li menm li ki pe tonm an gran en kantite, ek sanzman klima. Mersi Mr Speaker.

Mon dir ek Onorab William kont lo mwan. I en Mosyon vreman enteresan e mon krwar poudir se ki bann zofisye dan sa domenn,

Lotorite *Planning* zot pe ekout nou ozordi. Mon swete ki zot pe ekout nou, pour zot ganny en konpran pou dir nou, nou pe siport zot *full kilo*.

Nou kontan sa travay ki zot pe fer. Nou apresye. Akoz souvandfwa, nou menm nou, nou vin kot zot pour nou rod serten gidans pour nou bann zabitan dan nou distrik.

E nou, nou la pour nou donn zot sa sipor kot zot war kot zot panse, zot merit serten led avek nou dan nou distrik pour nou kapab donn zot serten gidans. Ki bor bann landrwa, bann teren li menm li, pour nou ganny serten *advice* ek zot, pa ezite apros nou li menm li. Nou ava fer sa travay ansanm. Mersi.

**(APPLAUSE)**

#### **MR DEPUTY SPEAKER**

Mersi Onorab Roucou. Prosen enterven an lo lalis se Onorab Bistoquet.

#### **HON ANNE BISTOQUET**

Mersi Mr Speaker. Mr Speaker, i fer mwan loner pou segonn Mosyon anmennen par Onorab William ki pe demann tou bann lazans e Lotorite *Planning* pou revwar zot lapros ver laprouvasyon plan lenfrastruktir, prenan kont defi sanzman klima.

Parey nou konnen, sanzman klima i en fenomenn

global ki ganny koze par aksyon imen e an retour, i sanz nou model klimatik e detri nou latmosfer.

Lefe sanzman klima i enn ki alarman e ranpli avek bokou konsekans. Sa konsekans i pli vizib lo bann Pti Leta Zil parey Sesel, kot pli ale nou pe eksperyans lanmer ki mont pli o plis e pli gro lapli dan letan kot lontan nou ti konsider sezon sek e vis versa. E letan ki vin pli so, ki vedir tanperatir i ogmante. I ogmant plis ki oparavan.

Mr Speaker, etandonnen ki se bann pei devlope ki kontribye pli gran poursantaz ver sanzman klima, Sesel koman en Pti Let Zil i annan otan ki nou kapab fer.

Wi, nou fer tande nou lavwa dan bann some, konferans e konvansyon enternasyonal, me nou osi bezwen pran aksyon imedya isi se nou pou asire ki nou an sekirite e pli mye posib.

Enn bann fason se ki sa Mosyon pe propoze ozordi. Nou bezwen rod meyer fason pour ki nou bann lenfrastriktir pa vin deplizanpli vilnerab par bann fenomenn meteolojik ekstrenm. Tel ki gro lapli, linondasyon, lanmer mont, gro divan, eksetera.

Mr Speaker, mon espesyalman konsernen ler mon mazin bann landrwa ki'n ganny batir lo later konble.

Etandonnen ki sa bann landrwa i ranpli avek lenfrastriktir, bokou kestryon i vin antet letan nou mazin konsekans sanzman klima e lavenir.

E atraver sa Mosyon, nou pe demann bann lotorite pou pran konsiderasyon lenpak potansyel sanzman klima letan ki zot pe aprouv bann nouvo plan proze lenfrastriktir.

Sa i fer mwan osi mazin distrik Bel Ombre, Beau Vallon, Glacis, Anse Etoile e St Louis ki'n ganny enpakte bokou.

Mr Speaker, letan ki nou koz lo sanzman klima e lenfrastriktir. Sa akronim ki nou toultan refer avek se *SDG* ki nou konn li konman *Sustainable Development Goals* - *en d'autres mots*, se devlopman soutenab.

Dan pe fer mon resers lo sa Mosyon, mon'n aprann ki sa akronim dan verb devlopman lenfrastriktir i osi vedir *Sustainable Design Goals* - *en d'autres mots*, konsepsyon dirab. Konsepsyon dirab i baze lo soutenabilite ki direktteman enpakte e adapte a sanzman klima.

Premyerman, nou merit kontinyen ankouraz bann lespas verdir dan landrwa piblik ki ede e kontribye redwir *carbon footprint* e redwir tanperatir.

En legzanp mon kapab donnen se sa lespas ver dan distrik Roche Caiman a fas Stasyon Petrol. Bokou in demande pou annan devlopman dan sa landrwa. Bokou in demande pour ki bazar i bouz dan sa landrwa. Me mwan, mon pa krwar ki sa landrwa i merit ganny devlope. E o kontrè, i en lespas ver ki nou merit prezerve.

Lo sa laliny, mon sizere ki nou ganny en bon definisyon lo bann lespas piblik, bann landrwa verdir ki merit ganny proteze e kot zot sitye.

Dezyenmman Mr Speaker, konstriksyon bann batiman komersyal, enkli lotel, i merit favoriz inovasyon dan konsepsyon e konstriksyon teknolozi.

Dan sa ka, Lotorite *Planning* e *PUC* i kapab zwe en gran rol pou revwar fason ki sa bann batiman ki servi bokou lenerji an term konsonmasyon kouran. E ede pou kree bokou *carbon emission* dan ler. Zot kapab revwar bann fason ki sa pratik i ganny fer dan en fason *ecofriendly*.

Dan menm laliny Mr Speaker, letan nou koz lo konsepsyon dirab vizavi bann batiman komersyal, lotorite i kapab bouz dan direksyon ankouraz *green roofs*, ouswa

*garden rooftops* lo sa bann batiman.

Sa i merit ganny promote. Espesyalman bann lenfrastruktir ki viz ver devlopman tourizm, tel ki bann lotel. Sa i ava ede avek lenpak sanzman klima, redwir konsepsyon lenerji. E fer ki i annan en pli bon kalite ler pou respire, eksetera.

Trwazyenmman Mr Speaker, nou bezwen asire ki nou kontinyelman annan bann lenfrastruktir rezilyan. Nou bezwen kontinyelman batir bann lenfrastruktir ki for, soutenab avek abilite pou reziste sikonstans, stres e sok lanvironnman.

Par egzanp; *building regulations* i bezwen aplikab pour tou zil avek devlopman isi Sesel, non pa selman bann ki annan plis popilasyon. Parey nou konnen, se Lotorite *Planning* ki sa antite reglemantasyon pour bann devlopman.

Parey nou konnen ziskan prezan, bann Zil Pros pa pe vreman eksperyans lenpak siklonn. Menm si deplizanpli i pas en pe pli pre avek nou, kontrèman avek bann zil elwanye, ki zot souvandfwa eksperyans gro tanpet siklonn.

Bann lenformasyon ki nou anmase, i demontre ki deplizanpli bann Zil Pros nou

pe eksperyans pli gro lapli. E ki pli for ki oparavan.

Alor, i enportan ki bann regilasyon i fer bann propozisyon tel ki elevasyon bann fondasyon e adaptasyon bann drenaz ki vreman kapab soutenir bann tel sityasyon koze par dezast natirel.

Deplis Mr Speaker, Lotorite *Planning* i annan en paramet pour bann *soakaway pits* pour devlopman. Lalwa i demann en zistans 4.5 met e i bezwen lo later sa propriyete. Sa pe gradyelman vin pli difisil avek limitasyon teren, ki fer ki bokou teren i komans 450 met kare.

Si en gran fanmir ti a swete konstrir en lakaz 4 a 5 lasanm, sa pou fer ki *soakaway pit* pou bezwen annan en pli gran kapasite a en paramet 4.5 met zistans avek sa lakaz.

E avek sanzman klima kot lapli i tonm pli for e pli bokou, Lalwa i demande ki delo lapli ki koul lo twatir i bezwen tonm lo ou propriyete ki ganny enfiltre dan later, e prenan kont, ki sa i afekte bokou sa bann *soakaway pits*.

Prenan kont en pti pei parey Sesel, petet *PUC* i a kapab etabli en plan ki santraliz tou *sewage*, rezerv *septic tank* e *soakaway pit* pour serten bann kategori en landrwa kot lenfrastruktir *piping* pa aksesib.

Mr Speaker, en lot sizesyon petet olye *PUC*, nou kontinyelman annan bann *grid* elektrisite ki souvandfwa *overload* e konsonm bokou lenerji, *PUC* petet i kapab mazin envestir dan bann *hybrid generators* ki ava retir presyon lo bann *grid*.

I annan en fason ki bann pei aletranze zot fer en sistenm batri. Kot sa *tenant* oubyen *household* i pey en sonm tou le mwan. Zabitan ava annan en swa ant sistenm elektrisite tradisyonnel, *solar panel* ouswa bann sistenm *hybrid* batri. Sa pou ede redwir kontribisyon sanzman klima.

Mr Speaker, nou demande ki bann lotorite i fer en letid e en revi profon lo bann regilasyon Lalwa e Polisi an plas vizavi en lenfrastruktir, afen ki i pran kont tou bann defi sanzman klima.

An term bann lazans ki Lotorite *Planning* i *liaise* avek pou aprouv bann plan. Sa i refer avek tou Sekter Gouvernman ki relye avek devlopman imen.

Ki vedir Minister Lagrikiltir Sanzman Klima e Lanvironnman. Minister Later e Lakaz, Lotorite Lasante Piblik, Lazans Servis Tenny Dife ek Sovtaz, Departman Transpor lo Later, Lazans Transpor lo Later. E dan serten sikonstans, i enkli *IECD* letan i enkli en zanfan.

Legzanp, konstriksyon lakot, nou merit a tou moman pe pran kont proteksyon lakot e rezervasyon bann lanmar, e lezot resours natirel. Parey nou'n vwar Lotel *Canopy* ek Lotel *Lemuria* in fer, zot in adopte sa bann lanmar e pe byen mentenir li. Zot pe servi sa bann eleman natirel pou azout valer zot devlopman. E an menm tan, zot mentenir sa bann resours afen ki i touzour azour e ganny proteze avek bann sanzman dan lanvironnman.

Dezyenm legzanp; konstriksyon kominoter i merit pran kont lenpak glisman teren, linondasyon, gro divan, afen ki zot ava touzour annan en devlopman soutenab pour lakominote e sekirite piblik.

Alor Mr Speaker, mon pou donn tou mon sipor sa Mosyon, afen ki nou pei e nou kominote ava bouz pli devan. E nou bann lenfrastriktir a reste touzour azour e rezistan kont bann defi sanzman klima. Mersi Mr Speaker.

**(APPLAUSE)**

#### **MR DEPUTY SPEAKER**

Mersi Onorab. Mon pe regard ler. Kantite Manm ki reste ki'n eksprim lentere pou koze, i annan 4 Manm. E aprezan tou bann dimoun so far ki'n koze. Zot in koz apepre 15 minit.

Mon pe regarde avek *right of reply*, so nou kapab go en sel la. *By* 1er, 1er en kar nou fini. Lasanble i termin son travay pour ozordi. Wi. *Unless* i annan lezot Manm ki sa. Si non, nou *ok* ek sa?

Akoz lot Mosyon i dan mon non. Mon pa kapab prezant en Mosyon *from the Chair*. So *obviously* i pou bezwen vin semenn prosen. *Ok*. Onorab Arissol ou'n dir mwan tir ou non. *Ok*, so prosen lo lalis i Onorab Aglae.

#### **HON EGBERT AGLAE**

Mersi Mr Speaker. Mon a dir bonzour tou Manm Onorab e tou dimoun ki a lekout. Mr Speaker, Mosyon ki la devan nou i annan en demann ki pe demande pou revwar lapros ver laprouvasyon plan lenfrastriktir, prenan kont defi sanzman klima.

E Mr Speaker, letan mon'n ekout bann enterven an lo sa Mosyon, mon santi poudir nou bezwen regard osi bann lezot konteks. Akoz mon santi i annan serten mankman ki bezwen ganny adrese atraver sa Mosyon.

San ki nou bezwen petet pe montre ledwa. Akoz, an prensipal, lotorite konsernen ki dan sa Mosyon se *Planning Authority*. E *Planning Authority* i ganny gide anba *en Physical Planning Act* ki nou ti amande dernyerman la 2021.

E osi apre in vin avek bann diferan *S.I* kot i konsern bann reglemantasyon. Sirtou bann *fees* ki ti vini apre. E konpozisyon dan *Planning Board* li menm li ki egziste i fer ki i annan bann *layers oversight* dan zot travay ki'n ganny *set up* dan Lalwa li menm. *Ok?*

E bann reprezantasyon osi kot i konsern laprouvasyon bann plan, i annan bann diferan departman. Mon krwar ki zot annan ase lekspertiz pour zot vwar bann diferan eleman kot i konsern planifikasyon en devlopman dan nenport ki *area*.

E letan osi mon'n regard en pti gin bann defi ki *Planning* i fer fas avek. Mon krwar i enportan. I fer ou osi konpran magnitud sa loperasyon ki *Planning* i fer avan ki en plan i aprouve dan son totalite.

E osi regard kliyan ki annan en plan devlopman, ki annan en vizyon, ki annan en rev pou devlop, swa son propriyete. Ouswa i kapab en lotorite atraver Gouvernman ki annan en *projet* pou fer osi. So...

I annan serten kompleksite ki atase avek sa bann faz. Wi, sanzman klima i enn topik ki ozordi globalman pe ganny diskite. Sirtou konman nou en Pti Leta Zil nou. Nou annan bann vilnerabilite ki atase avek nou.

Me osi nou regard osi konteks nou lanvironnman. Nou teren ki ozordi i egziste. E Sesel. Mahe sirtou. E nou bann zil koralyen otour nou, i pa bann zil ki plat. Nou annan plis montanny.

E letan ou get sityasyon devlopman lo kote lakot, tou bann landrwa mon kapab dir ki nou kapab konsider plat, in satire avek devlopman. E nou bezwen bouz ver montanny si nou pe regard bann devlopman a lavenir. Mon krwar i enportan nou met sa dan sa bann konteks. E taler mon pou etabli akòz mon pe dir sa.

E tou kliyan mon krwar ki vin avek en plan pou soumet, i bezwen pas atraver detrwa formalite. Premyerman ou bezwen annan ou, ou bann dokimantasyon legal kot i konsern ou teren. E la ou ava al ver en arsitek ouswa en *draftsmen*.

Mon krwar la letan nou pe koz lo lapros, i annan serten responsabilite ki konmanse depi la li. Akòz ou bezwen ganny *advice*. Wi, ou anvi fer en devlopman. Petet, ou rev baze lo ou landrwa ki ou pe fer, ou bezwen ganny en *advice* si i posib pour ou devlop li lo kantite magnitud. Ki lanplè.

Akòz parfwa i arive ki nou fors serten devlopman lo en nivo magnitud

ki apre i dekoule, i vin koz serten lenkonvenyans dan zalantour sa landrwa li menm.

Akoz swa sa ki anba, sa ki pli ba. Akoz planifikasyon pa'n ganny fer. Ouswa sa *oversight* responsabilite. Ouswa pa'n ganny *advised* byen poudir pou annan sa bann lezot konsekan.

Wi, en arsitek, en *draftsman* i en biznesmenn i osi, aköz i anrezistre pour li ganny son larzan e son travay. *Ok?* E ou konman sa kliyan ou, ou anvi ou keksoz i bouze, aköz lenstitisyon, petet labank pe esper ou pe dir ou, fini ou *business plan*. Anmenn ou plan.

Ou osi ou'n *set* en serten target poudir dan 1 an mon bezwen fini sa mwan. Ouswa nou pe get kondisyon letan. I annan letan ki sek Sesel. I annan letan ki lapli. Ou pe sey *squeeze in* ou osi. So, letan mon dir konpleksite, i sa bann keksoz parey sa ki mon pe koz lo la.

So, annou bouz de lavan lo sa letan nou dir en plan pou aprouve. Byensir, anba Lalwa, *Planning*, letan nou pe dir reviz lapros - mon pa konnen ki kalite lapros loter Mosyon pe dir reviz lapros.

Akoz Lalwa i kler li ki anba *Physical Planning Act* i dir ou, ou pou bezwen annan en *land use plan*. E mon swete ki sa bann *land use plan* ki

*Planning* – i annan bann lezot distrik pa ankor fini fer - i kapab ganny fini fer. E met li azour ki i reflekte osi laspe rev e modernite ki egziste ozordi.

Sa i ganny gide dan *part 3* zot Lalwa sa, *ok. Land use plan and development plan*. E dan *part 4* zot Lalwa, i koz lo kontrol of lo devlopman. Kwa ki ou kapab fer dan en landrwa ouswa dan en rezyon, kwa ki ou pa kapab fer dan sa landrwa. Tousala i ganny kapte ladan.

E i annan en bout enportan ankor, se *part 6* kot i konsern *enforcement* dan Lalwa. E taler mon pou tous en pti bout lo bann defi kot i konsern *enforcement*. *Ok ?* E si lenforsman pa marse ouswa si i annan bann *breach*. Byensir i annan bann lofans ek penalti ki al avek.

So Mr Speaker, i annan bann *layers* dan Lalwa ki i fer provizyon pou vwar. Me eski tousala pe ganny regarde ozordi? E mon krwar petet i kapab annan bann zofisye *Planning* ki pe ekout nou ouswa bann manm *Board* ki pe ekout nou.

Mon krwar nou bezwen osi *être* en pti pe pridan lo kwa ki nou dir pou pa *upset* serten sa bann dimoun. Me nou santi poudir petet parfwa, wi, i annan serten legzizans ki ganny atase, *ok ?* Akoz i annan en kantite difikilte osi.

E i annan dimoun ki vatevyen avek en plan pou soumisyon akòz i annan sa bann vatevyen. Akòz i annan sa bann *check boxes* ki regilasyon i rekomande ki ou bezwen *meet* sa bann kriter avan ki finalite laprouvasyon i fer. So mon'n dir pou dir i annan sa bann *layers of oversight* ki egziste dan Lalwa.

Now, i annan bann lezot konsern ki *Planning* li i vin met devan nou prezan. I dir ou, mon'n aprouve, wi, be letan mon'n aprouve, mon'n donn ou bann konsern *non-compliance* ki arive sirtou avek bann devlope, kot plan inisyal i ganny kas. Ouswa kontrakter pa respekte sa ki ti ganny mete dan sa plan. E i annan bann devyasyon ki arive. E tousala i koz serten problem.

Osi, i annan bann lenstans kot plizyer fwa pour rezon finansyel sa - ou'n ganny dir ou annan 2 ouwa 3 miray lo en plan pour ou fer. Sa pou protez ou propriyete e pou protez lanvironnman - ou *surrounding*, sa propriyete ki par anba ou, pour rezon finansyel, ou pa fer li, ou *projet* i fini e la i koz en danze e ouwa en menas pour sa bann keksoz ; pour sa bann propriyete ki anba ou. So tousala i annan pou fer ek *non-compliance*, ok?

I osi fer mansyon lo bann rol ek responsabilite. *Planning Authority* i fer resorti poudir, souvandfwa letan plan i ganny met devan zot, zot fer bann rekomandasyon avek parti prenan ki'n vin avek son plan. E souvandfwa, promoter i dir ou wi, i pou fer. Me apre i pa *stick* avek. I pa gard son parol. I pa gard son parol, sirtou, letan nou annan bann gro *projet*. La nou pe koz bann gro proze, parey bann *class 1 EIA*, ki bezwen bann *class 1 EIA*, nou'n war sa. I dir ou i pou fer.

Me selman *in the end*, letan piblik i ale in *raise* konsern. La prezan ki zot bezwen taye pou al reponn kekyon. Ouswa defann serten laspe dan sa bann proze. So tousala i en konsern sa. Sirtou si ou pe fer- Nou pe fer devlopman kot i konsern lakot.

I kapab en lotel. I kapab en restoran. I kapab en *guesthouse*. Me nou tou nou konnen sanzman klima, nivo lanmer i pe monte gradyelman. Me pa parey sa ki zot pe dir nou. Me selman i pe monte gradyelman. Ok?

Be letan movetan in arive. Ou pa'n swiv kondisyon *Planning*. Byensir serten - si ou'n met serten lenfrastruktir ki pa sipoze la, i pou ganny afekte. So, i annan en bann rol *oversight* ki bezwen ganny *enforced* mon krwar dan son

pli o standar posib. Ou *breach*. Ou bezwen fer fas avek Lalwa e ganny gide anba la.

Mr Speaker, letan nou pe koz lo sa size sanzman klima osi, e bann *land use plan*, mon osi tous sa size – e taler i annan en Onorab ki'n koze ot kote, bann lespas enportan - swa *green space* pour lwazir, ouswa pour *sport*. Parey nou dir - *leisure and sport*.

Dan Sesel, dan Mahe sirtou lo Mahe, nou konnen nou teren - i annan en lager teren ozordi. I annan en lager teren ki annan pou fer avek devlopman lenfrastriktir. I annan en lager teren pour lagrikiltir pour sekirite alimanter. I annan en lager teren pou annan bann lespas pour dimoun bouze, diverti kontan fer *sport*.

E si nou pa fer atansyon avek mannyer nou regard *land use plan* li menm dan son totalite, e osi legzizans priyorite demann bann rekomandasyon lanbisyon *projet* pei li menm, nou riske war nou dan serten sityasyon. Mon dir sa aköz?

I preski napa preski ditou *green space*. Sirtou bann landrwa kot dimoun i frekante dan en fason ki ou a dir, eblouir. E pe ganny pran sa. Lo kote *sport* e bann *leisure* osi i preski parey. La mon pou sit enn de la.

Parey nou kontan dir; lontan ti annan dimoun ti kontan apre ler al Ste Anne *Jetty* pou al fer zot pti defoule parey, napa landrwa pou ale. Swa zot ti al Beau Vallon. Ouswa ti annan bann lenstans lontan ti al lo *jetty* laba kot *Cat Cocos* menm.

Tousala ozordi in restrikte. Ozordi sel landrwa i *Dockland*, e i annan en leokri la deor. *Ok ?* Nou annan bann landrwa Roche Caiman osi ki'n ganny mete, *earmarked* koman bann landrwa *green space* ki ozordi i an menas.

E la resaman nou annan zwe *CJSOI* ki pe vini. I annan en landrwa, en pti laplenn kot bann foutboler ti *practice*. I annan ki ti vin *warm up*. Sa ki ti pas lo *trail*. La pe al fer lozman pour bann - *sportsmen* ki pou vini. So zot war poudir i annan en lager ant lespas ki pe arive.

Me eski nou pe kominik ase byen pou demann bann lopinyon pou vwar ki mannyer nou kapab vwar ki bann landrwa pli apropiye, pou fer sa bann tel kalite devlopman? E ki mannyer nou armoniz li avek sa demann pour landrwa lwazir?

Akoz sansan, pou napa bann lezot landrwa pou dimoun defoule. Ou pou bezwen swa reste se ou. Ouswa zot pou fer bann *sport* ki apre nou pou dir i ilegal. So,

i annan en refleksyon ki bezwen ganny fer dan sa laliny.

So Mr Speaker, an terminan lo la, mon en pe konsernen mon lo sa lapros ki bezwen ganny pran anver laprouvasyon pour bann – sirtou bann plan devlopman.

Enn; nou bezwen annan plis konsiltasyon, *ok*? I annan plizyer plan ki pas atraver Lotorite Distrik ozordi *ok*? E letan nou vwar letan i pas kot DA – i pa vin kot MNA. I vin kot DA. Prezan DA i kapab konsilte ou si li i pa konnen kote sa devlopman pe fer. Me letan ou pe regard kwa ki zot pe demann ou se, eski nou dakor ek sa devlopman?

Me mon santi nou devret al pli lwen lo la. Akoz koman en MNA dan en distrik, *without being politics* - *without* osi rod fason, sa en tel. Nou pa pou aprouv son plan. Ouswa nou pou – non, non. Mon pa pe al dan sa direksyon la mwan.

Mon pe koz lo lesansyel Mosyon ki letan en plan i vin devan Lotorite Distrik la. MNA i konn sa distrik li. I konn bann evantyalite teren laba li. In pase. I annan landrwa kot sezon sek ou pa pou ganny ditou lapli. Napa *seasonal stream*. Me letan i annan letan lapli, ou war en sel kou i annan en *seasonal stream* ki vini.

Tousala, i bann lekspertiz ki nou koman MNA dan en distrik nou konnen e ki nou kapab *advise* lo en plan ki vin soumet dan nou distrik pour nou kapab dir; be la mon krwar nou bezwen fer atansyon - regard sa plan byen. Ouswa demann en pre *planning* vizit. Ouswa *request* ki i annan *site visit* ki nou kapab fer li pour Lotorite Plan vini, pour nou regarde. E sa konsern i ganny adrese dan en fason ki apropiye.

E osi letan nou pe regard - sirtou si nou santi poudir devlopman ki pe ganny fer i kapab afekte en lot group dan lakominote, ouswa poz serten danze, nou ti kapab ganny sa bon lantant. Bon komunikasyon.

Se sa ki nou fer. Nou osi nou ava annan en rol *oversight* avan *the final approval* i ganny donnen. E la nou a evite ki i annan bann problem ki ler devlopman i vini, ki nou pa'n prevwar. So avek sa Mr Speaker, mon pou dir mersi pour ou donn mwan sa loportinite koze. Mersi.

**(APPLAUSE)**

**MR DEPUTY SPEAKER**

Mersi Onorab. Prosen entervenon, Onorab Loizeau. E parey mon ti dir zot taler, tou bann Manm ki'n koze so *far* zot pe pa plis ki 15 minit.

So annou pran sa an kont.  
Mersi.

### **HON NORBERT LOIZEAU**

Mersi Mr Speaker. Bonzour tou Manm. Bonzour tou dimoun a lekout. Mr Speaker, mon a sey mon mye pour mwan kapab termin dan 15 minit.

Mr Speaker, mersi pou ganny sa sans pou koz lo Mosyon Onorab William. Mr Speaker, mon krwar sa Mosyon pour mwan i annan bokou merit. Pour mwan i annan bokou merit akòz i annan bann levennman ki'n pase, ki'n montre nou en ta keksoz. E si nou pa fer atansyon, keksoz pou vin pli serye.

Mr Speaker, nou bezwen konpran ki lanatir nou pa zwe avek. Si nou zwe avek lanatir, nou pou dan problem. Mr Speaker, linondasyon ki ti arive ki ti annan *flooding* dan lavil. E mon mazine sa letan se Corgat Estate. Corgat Estate ki ti pli ganny afekte Mr Speaker. Ti montre nou en ta keksoz. E nou ti vwar sa *flooding* pour ki rezon ki'n arive.

Se akòz bann dimoun ki pli o avek zot bann move konportman ki'n fer ki larivyer Roson ti deborde avek tol, *cooker* - nenport kwa debri. E

sa ti afekte tou zabitan Corgat Estate.

Mr Speaker, mon osi rapel le 7 Desanm ki mon pa pou koz lo la akòz o bor mwan dan mon distrik, i annan bann dimoun ki annan bann move memwar an relasyon ek sa. I osi in montre nou – in montre nou en leson.

Mr Speaker, sa i montre nou ki parfwa problem i dan leo. Sirtou bann landrwa ki dan rezyon montanny. Mr Speaker, i annan bann aktivite ki pe ganny arive pli o ki pe fer bokou dega ki pe anmenn de balansman.

Avek sanzman klima Mr Speaker, nou konn tre byen ki ozordi lapli ki ti tonbe pour – ki petet ki ti tonbe pour 1 mwan. Ozordi dan 1 zour nou kapab ganny sa kantite lapli. E se sa ki ti arive le 7 Desanm. Lapli ki ti sipoz tonbe pour 1 mwan, ti tonm dan 2, 3erdtan. E zis mazine Mr Speaker ki ti arive.

E dega ki ti fer Mr Speaker, pour nou Sesel avek en pti popilasyon ti tro bokou pour nou kapab abzorbe. Mr Speaker, sa i an rezilta parfwa lafason ki nou konman imen nou konport nou, ki rezilta parfwa dan sa bann kalamite.

Mr Speaker, mon rapel bann kalite fason ki lakaz ti ganny konstrir lontan. Be la mon mazin lontan ti annan lakaz plizoumwèn ti ganny fer

lo de. Mon konnen i annan bann ki pli zwenn pou rode, kwa sa de?

Petet bann ki en pti pe pli vye parey mwan, Onorab Mondon, Onorab William. Petet Onorab Arissol ki li dan son vokabiler i annan bokou. E taler nou'n tandé. Mr Speaker lakaz ti ganny fer lo de. De se sa bann ros ki nou ti met enn lo lot. E lakaz li ti ganny konstrir lo la.

Mr Speaker, mwan mon'n fer sa leksperyans sa bann lakaz koumsa. Mon'n reste ladan. Sa letan, i ti konfortab.

E rezon ki nou bann vye paran ti konstrir dan sa fason Mr Speaker, se ;

Enn; pour ki i annan vantilasyon. Vantilasyon anndan.

Dezyenm; se pour ki zanmen ki si zanmen i annan en linondasyon kot en larivyer i deborde. Kot gro lapli i desann i anmenn gro delo ou pa ganny afekte, Mr Speaker.

E sa ti lespri ki nou bann vye paran ti annan. E ti en nide ekselan Mr Speaker. Akoz dan bann letan, nou pa ti tro, tro ganny afekte. Malgre i ti an bwa, borde ek dibwa, tol, lafnet, ler gro lapli, personn pa ti ganny mouye e personn pa ti an danze.

Mon fek pe koz ek Onorab Mondon taler i ti

eksplik mwan en lakaz dan *Bazarca* laba.

Mr Speaker, avek devlopman ki'n arive, nou pa'n pran - nou pa'n pran kont sanzman klima. Petet sa letan Mr Speaker, keksoz pa ti parey i ete ozordi. Alors nou ti pe plizoumwén les keksoz pase. Me avek leksperyans ki nou'n aprann, petet aprezan in fer nou pli konsyan.

Mr Speaker, ti annan en moman kot mon rapel ler bann nouvo lakaz ti pe ganny konstrir, tou dimoun ki ti konstrir lakaz ti bezwen fouy fondasyon pour zot kapab fer zot lakaz.

Mr Speaker, e keksoz ki serten bann dimoun pa'n servi. Menm bann ki zot lakaz ti lo de, sa sistenm ki nou apel de sa letan, zot osi ki zot ti fer. Zot ti kraz zot lakaz e zot in konstrir ater.

E ozordi zot, zot pe ganny konplikasyon, kan zot ti kapab amelyor lo la, fer li pilye. Ti preski menm zafer. Me selman sa letan sa sistenm ki ti servi ti en sistenm ansyen. Me selman mon panse zot ti a kapab fer li dan sa mannyer. Me ozordi, bokou zot pe ganny difikilte.

Ozordi Mr Speaker, dan rezyon montanny, e menm en pti pe pli ba, tou sa ki nou apel bann pti *seasonal stream*, ozordi in vin bann gran larivyer. Avek le 7 Desanm Mr

Speaker, mwan dan mon distrik Bel Air, ti annan landrwa ki ou pa ti war delo - ki ou pa ti war en larivyer, ozordi ou pe trouve.

Si nou pas dan rezyon lavil nou get dan lateras anba semen Bel Eau, i annan en *massive* larivyer ki'n zis sorti dan sa lateras. E nou bezwen fer zis pran prekasyon. Akoz a lavenir si nou pa fer keksoz avek, sa morso semen i kapab desann e i pou en danze pour bann lakaz ki pli ba.

Mr Speaker, e bann ki'n konstrir pli o, parfwa zot in sanz direksyon ki serten delo pe pase pour zot kapab fer zot konstriksyon. E sa ki pli ba Mr Speaker, se zot – se zot ki'n sibir le konsekans.

E pli boner Onorab Roucou in fer sorti en pwen enportan lo *septic tank*. Lontan, si ou ti annan en pti delo ki ti koule o bor ou lakaz. Lontan ou ti kapab servi, menm pou pran en pti *shower* deor. Nou tou nou bann ki en pe ansyen nou rapel, nou ti kontan. Me ozordi ou pa kapab avek bann *septic tank* ki'n ganny mete pli o, Mr Speaker, ou nepli kapab fer sa.

E mon apresye ki Onorab Roucou in refer sorti sa pwen bann *sewage system* ki kapab ariv en pe pli o. Akoz, zis mazine, anler dan Bel Air plizoumwen mon pou koz lo la

- nou annan en ta larivyer. E par lao sa bann larivyer i annan bokou sa bann konstriksyon ki'n ganny fer e ki bann *septic tank* zot bann delo pe *still* sorti e petet pe tourn avek nou bann larivyer.

Be sa ki mon kontan Mr Speaker selman, mon'n war ki *Planning Authority* pe fer en pe keksoz. Mon vwar ki bokou konstriksyon ozordi Mr Speaker, pe ganny fer lo pilye.

Ler mon pas Beau Vallon - Beau Vallon mon war sa. En pe partou mon war - dan bann rezyon montannye, dimoun pe konsyan ki *excavate* en landrwa pou fer fondasyon pou mont en lakaz i pa feaab. I pa byen. Vi ki dimoun pe pran kont ki i posib ki petet i kapab annan en pti delo ki pe desann.

Mr Speaker, be dan nou bann plato? Dan nou bann plato nou vwar ki i annan bokou dimoun ki ankor pe fouy fondasyon pour zot konstrir. E zis mazine, nou annan nivo lanmer ki pe kontinyelman monte. Eski sa i feaab pour nou kontinyen, bann ki reste dan plato, kontinyen fer zot lakaz ater?

Mr Speaker, mon rapel, i annan bokou landrwa partou lo Mahe ki dan plato, lakaz ti lo sa sistenm ki mwan mon ti dir ki nou bann vye paran ti kontan servi lo la. Ozordi tousala in ganny demoli e

dimoun in plizoumwen konstrir ater.

Me avek delo ki pe monte Mr Speaker, byento a lavenir nou pa konnen si nou pa kapab ganny en fason pou *mitigate* sa sitasyon. Zot kapab dan problem.

Nou'n vwar Mr Speaker, lo bann plato partou Praslin, Amitie. Kot bann zefor in ganny fer pou sey fer serten keksoz pou sey anpese ki sa *seas level rise* i afekte nou lakot. Me selman nou ankor pe seye Mr Speaker.

Port Glaud. Port Glaud miray in ganny fer, aköz nivo lanmer ler i monte, i bate i ariv lo semen. Au Cap, North East Point. Mr Speaker, partou i annan sa bann keksoz pe arive.

Malgre nou fer baraz Mr Speaker, gronny parey Onorab Woodcock i kontan fer sorti, me *still*, lanatir i pli for ki nou. Alors mon zis demande, eski nou pou ranport laviktwar avek lanatir?

Mr Speaker, si nou pa ranport laviktwar kont lanatir, mon zis mazin ki pou arive avek bann ki pe reste lo nou bann plato en pe pli ba?

Mr Speaker, nou bann *coastal plain* parey nou dir. Mr Speaker, zot pou bezwen – zot pou bezwen bouze. Pa bliye, nou pe ganny afekte avek lanmer ki pe kontinyen monte son nivo.

E osi, nou pe pran kont. Nou pe lager avek bann delo ki pe sorti dan montanny ki pe inond nou bann plato. E parey nou konnen dan nou bann plato *coastal plain*, i annan bokou laferm. E plizyer fwa Mr Speaker, se zot - se zot sa bann dimoun ki ganny afekte.

E i enportan alors Mr Speaker, ki lotorite i pran sa bann ka o serye, pou fer sir ki omwen nou a seye fer serten keksoz pour nou kapab anpese ki sa bann evantyalite i arive.

Mr Speaker, an terminan mon anvi remersye tou bann dimoun, bann groupman ki konsernen avek bann *issues* lo sanzman klima. Mon konnen ki Lasanble Nasyonal nou *involve* ladan. Nou pe fer bokou nou osi Lasanble Nasyonal, an partenarya avek sa groupman la, *Parley*, ki annan sa zenn fiy Alvania Lawen ki aktivis lanvironnman ki pe fer bokou li osi dan pei.

E kot lanvironnman i annan en groupman *ecowarriors* kot i annan bann zenn ki pe kontinyen travay pou fer bann serten travay zot osi an relasyon avek lanvironnman, sanzman klima e tou.

E dan bann lekol Mr Speaker, dan bann lekol i annan bann *Eco School* ki'n formen. Bann pti groupman ki

apel *Eco School*, kot sa bann dimoun zot pe travay ansanm e zot pe fer zot mye Mr Speaker pour zot kapab kontribye eseye pou sov nou planet later ki mwan mon panse i an danze avek sanzman klima.

E nou Sesel konman en Pti Leta Zil Mr Speaker, nou vreman vilnerab. Malgre ki pa nou ki pe koz – ki'n kontribye pou koz tou sa bann keksoz, me selman nou bezwen fer en fason pour nou kapab fer keksoz pour ki Sesel a kapab petet mon pa konnen – sorti dan sa sityasyon kot nou ete.

Alors mon anvi dir avek Onorab William, mon pou siport son Mosyon, aköz son Mosyon i en bon Mosyon. Me selman mon anvi rekonnet ki *Planning Authority* Mr Speaker, pe seye fer serten keksoz. Mon remerci zot pour sa e mon anvi dir zot, malgre Mosyon in vin devan nou. Nou pa pe akiz zot. Nou anvi ki plis i ganny fer ankor. Mersi Mr Speaker.

### **MR DEPUTY SPEAKER**

Mersi Onorab. I reste nou 2 entervenans. Onorab Arissol in dir i pa pou koze. Prezan Onorab Naidu in demande pour li fer en *short intervention*. So, *I will accord you* sa privez. Solman ou gard ou promes ek mwan? *Ok, very well.*

### **HON SATHYA NAIDU**

Wi, Mr Speaker. Mon pa pou long, me selman mon'n santi i annan en lobligasyon pour mwan koz lo sa Mosyon, prenan kont devlopman ki'n annan dan mon distrik.

Zisteman mon ava al lo topik le 7 Desanm 2023. In demontre poudir in annan pa mal devlopman ki'n ganny fer otour plizyer distrik dan pei. E byensir, si serten regilasyon *Planning* ti'n ganny swiv e le lesansyel ti'n ganny fer, bokou dimoun pa ti pou trouv zot dan sityasyon ki zot, zot ti ladan.

Alors, nou pa la pou montre ledwa lo Lotorite *Planning* ouswa bann travayer ki la a ler aktyel. Me selman ou bezwen poz kestyon lo lafason ki sa lotorite ti pe deservi son responsabilite vizavi lobligasyon ki li i ti annan. E an menm tan, dimoun osi pa'n swiv lareg ki merit ganny swiv ki'n met zot dan bann sironstans ase difisil.

In osi annan devlopman kot ou pa devret pe konstrir par lao en larivyer, selman in ganny fer, senpleman aköz pou favoriz sa aplikan pou fer sir ki i pa pe fer fas avek lenkonvenyans.

Me an menm tan i kapab annan en lot dimoun ki pe vin avek menm propozisyon, me selman li i ganny dir i pa kapab ganny fer aköz regilasyon.

An relasyon ek sa size ki la, zisteman le 7 Desanm in montre nou poudir ki, baze lo plan bann batiman ki'n fini ganny konstrir ki deza la, nou bezwen regarde ki mannyer eski nou pou bouz an avan vizavi devlopman le fitir.

Me a ler aktyel, nou konnen poudir ki i annan bann diferan lazans ki ganny itilize pou regard risk ek bann mezir vizavi mitigasyon.

Konmela atraver Gouvernman Lokal, nou konnen poudir i annan en alokasyon pour *emergency projects*. En bon lenstans en *emergency project* se en *retaining wall*.

Kestyon se, eski nou pou kontinyen avek sa fason fer? Eski en *retaining wall is the best way* pour nou kapab apros en sityasyon kot lateras in desann e i a pe afekte propriyete en lot?

Ozordi, baze lo metodoloji konstruksyon, i annan en lot fason pou kapab apros sa sityasyon ki pou annan en benefis lonterm e i pou kout pei mwens.

Alors i ekstrememan enportan ki Lotorite *Planning* i konsyantiz lazans konsernen dan Gouvernman pou kapab fer le lesansyel, aköz i annan bann lezot metodoloji ki kapab ganny aplike dan en tel sityasyon.

E zisteman, parey mon'n konmanse o debi, mon'n fer referans avek en proze dan distrik. Nou pe enplimant en proze pour nou kapab stabiliz St Louis *Hill* apre lensidan le 7, kot nou pe enstal en *rockfall protection barrier*, ki fer ki nou pou dan en pozisyon pou kapab protez plizyer lakour par anba.

E zisteman, dan nou rezyon *La Reunion* ki pa tro lwen avek nou, zot pe enplimant bann proze dan menm stil kot i annan *rock netting, meshing*, apre menm *underpinning* ek bann lezot fason fer pou kapab stabiliz teren, pou kapab sekiriz ouswa sofgard propriyete e aki nou nasyon vizavi lenfrastruktir devlopman ki bezwen kontinyelman ganny fer.

Alors nou bezwen rekonesan poudir lafason topografi nou pei i ete, nou bezwen osi rekonesan poudir klima i pour kontinyelman sanze.

E lenterferans imen, pa neseserman dan konteks Sesel, me lo en baz global. Malgre ki pti Sesel i fer tou sa ki i fer pour kapab kree en lenpak pozitiv. Pa tou i dan nou kontrol. Pa tou i dan nou lanmen. Se bann lezot pei endistriyalize ki fer bann emisyon, ki fer ki pti Sesel i fer fas avek bann konsekans

negativ. Me kestyon se, '*what is the long-term approach* vizavi devlopman?'

E zisteman nou bezwen annan en *roadmap* an sa ki konserne bann proze ki relye avek *risk and mitigation*. E St Louis i en komansman. Bel Ombre, Le Niole osi i annan bann proze ki swiv.

E mon rapel ler ti annan lanons poudir konmkwa St Louis pe al resevwar sa proze, plizyer mon bann koleg in demande; be ki pe arive dan mon distrik?

E nou konnen poudir sak sa bann Onorab i ofe avek teren, zot ofe avek larealite la deor vizavi sirkonstans ki zot zabitan pe fer fas avek, prenon kont defi sanzman klima.

E alors i bezwen annan en *roadmap* an se ki konserne lenplimantasyon bann proze ki relye avek *risk and mitigation*, kot Lotorite *Planning* i pour bezwen konsyantiz son lekòr pour kapab donn laprouvasyon nesese vizavi bann tel devlopman.

E i annan en neseseite pour fer sir ki annan en mwayen finansman, pour nou kapab garanti poudir ki sa ki pe ganny fer ozordi St Louis, *it's just the tip of the iceberg*. Akoz i pour annan bann lezot proze ki pour swiv.

Deza i annan en lekip ki mon apresye travay ki zot pe

fer. En lekip Seselwa ki annan lekspertiz konesans e konprenezon vizavi devlopman lo baz Nasyonal ki pe arive.

Zot annan lopinyon ki zot pour byensir partaz a en moman apropiye isi avek Lasanble Nasyonal. Kot le lesansyel pour bezwen ganny fer par bann Lotorite konsernen pou pran ka avek devlopman lefitir.

Sa ki mon pe sey dir se byensir, i pour bezwen annan en departman anba *DRMD* ki pour bezwen get dan plan lonterm. E an relasyon avek sa, i pour annan en laspe finansman osi ki pour vin an zwe.

E se la kot i annan lenportans pour Lasanble Nasyonal konpran travay ki pour bezwen ganny fer. E sa i osi aplik pour Legzekitiv konpran rezonnman par deryer sa ki sa bann zofisye a en moman apropiye pour vin devan pour fer prezantasyon avek *Cabinet*.

Pour zot realize pou dir ki ler Mr Jean-Luc Mondon pa en zeolog i fer resorti serten pwèn konserne, se akòz i konpran sa size.

I konpran poudir ki wi, devlopman i en neseseite. Me nou osi bezwen kapab balans li avek mitigasyon kot Lotorite *Planning* i antre. E zot pour kapab konpran ki mannyer

eski zot, zot osi zot pour kapab asiste vizavi sa demars ki la.

An relasyon avek pwen ki Onorab Aglae in fer, mon pour tant pour dakor avek sa. Malgre ki nou sorti dan diferan parti politik. Me selman annou realize poudir ki a en serten pwen. Mon pa – mon lentansyon pour politiz sa size.

Me annou rekonesan poudir dan lepase aköz en MNA i lev en kout telefonn i lyez avek en zofisye dan *Planning*, mon pa pe dir ki konmela i leka, me nou konnen mannyer lepase ti marse.

E se lo sa baz ki *CEO Planning* isi dan sa Lasanble in dir ki i le mentenir sa striktir Lotorite *Planning* koman *apolitical*.

Me selman i enportan pour nou realize poudir ki nou koman bann MNAs, nou annan en nide vizavi devlopman ki dwatet ganny fer e pa dwatet ganny fer baze lo lefe ki kou konsilte nou bann dimoun, nou konn nou teren.

E en bon pe fwa i annan devlopman ki'n fini ganny aprouve. E finalman ler i annan problem kote eski dimoun i retournen? Zot retourn kot nou.

Alors i ekskreman enportan poudir ki se non-selman bann DAs ki ganny akse avek sa *portal* kot laplikasyon i antre, me i osi

egalman enportan pour nou koman bann MNAs osi ganny akse.

Wi, ozordi mon annan en bon lantant avek mon DA. I fourni mwan avek sa lenformasyon. Me i egalman enportan pour nou direkteman dan plas al atraver DA. Nou annan akse avek sa *portal* pour nou konnen, ki devlopman pe arive dan distrik, pour nou entervenir. E byensir vizavi bann laplikasyon *Planning*.

Mon pa pe donn tor bann zofisye. Me selman souvandfwa ler en aplikasyon i ganny rezete pour bann rezon valab, i ekstrememan enportan pour zot osi soumet bann rekomandasyon lo ki mannyer eski sa dimoun pour kapab bouz de lavan avek son aplikasyon.

Onorab Roucou in sit en legzanp tipik, kot sa *issue sewage* pe monte, kot en dimoun pe soumet en laplikasyon. Me i pe ganny dir i napa en koneksyon an relasyon avek *STP* par egzanp. Alors ki mannyer eski bann diferan lazans ki travay akote *Planning* pour kapab fer le lesansyel?

E annou pa bliye poudir ki dan lepase Gouvernman Lokal in fer pa mal peron dan bann diferan sou distrik. Me ozordi laplipar bann demars ki ti'n ganny fer sa letan, zot pa'n

fer provizyon an relasyon avek drenaz.

So alors ozordi mon panse tou bann plan ki ganny fer dan okenn distrik, i annan otomatikman sa provizyon pour en drenaz. E sa i aplik pour osi pour bann proze semen.

Mon war Mr Speaker, pe get mwan. So alors mon ava koup mon lentervansyon kourt. Akoz mon konnen poudir sa size ki relye avek mitigasyon vizavi dezaz pour mont dan Lasanble Nasyonal e mon a profite pour mwan koz en pe plis lo la.

Me selman mon asir Onorab William poudir ki i pour ganny tou mon sipor. Mersi.

#### **MR DEPUTY SPEAKER**

Mersi Onorab. I byen ou'n gard ou parol. Solman i ok aköz ou ti – i ti enportan ou koz lo ou proze St Louis. Aköz i en proze ki premye fwa mon krwar pe fer en proze koumsa dan Sesel.

E mon pe swete, Mont Buxton i enn sa bann distrik kot nou osi bezwen a lavenir depandan lo *availability* larzan bann keksoz koumsa.

So nou ava espere, me antretan swete ki nanryen katastrofik pa arive. Onorab Sultan, *you are next*.

#### **HON VALDANA SULTAN**

Mersi Mr Speaker. Bonn apre midi Mr Speaker. E tou bann koleg Lasanble an tou e osi bann dimoun a lekout.

Mr Speaker, loter Mosyon pe demann Lotorite *Planning*, pour revwar zot lapros ver laprouvasyon bann plan lenfrastruktir, prenon kont bann defi sanzman klima ki nou osi Sesel nou pe fer fas avek.

Mr Speaker, avan mon al pli lwen, mon a profite pour mwan rekonnet detrwa group. Bann ki petet mon en pe *involve* avek, par egzanp *Parley Volunteer* kot Alvania Lawen i enn bann akter kle ladan.

E ki fer bokou bann travay, pour lanvironnman. Mon rapel mon'n deza partisip ek zot dan bann proze anmas salte bor lanmer *Bazarca* e menm restorasyon bann - lo lakot, plant bann plan.

Mon mazin osi mon pti zanmi Angie Boniface dan Grand Anse, ki osi otan ki posib i sey anmenn bann zenn dan bann aktivite proteksyon lanvironnman.

E mon osi rann omaz madanm defen Philomena Jaqueline Port Glaud. Ki koman en trwazyenm-az pour bokou lannen in gid en group zanzan dan aktivite lanvironnman dan distrik.

E mwan osi pli tar mon'n zwenn li, kot nou'n fer plizyer

travay dan distrik lo nivo lanvironnman. E sirtou avek lotel *Ephelia* dan son proze restorasyon mangliye. Apre zot in fer konstriksyon sa lotel.

Mr Speaker, sanzman klima i nepli en keksoz ki nou zis tann koz lo la koman en koze lwenten, parey lontan. Sanzman klima i ozordi la.

Sesel in fini komans santi son lenpak, e pe deza fer fas avek. Mon pa anvi retourn dan bann levennman sagrinan lafen lannen pase. Akoz mwan osi pran kont ki sa i anmenn souffrans pour serten nou bann dimoun.

Mr Speaker, lanmer ki mont plis ki labitid, sanzman dan *pattern* ki lapli i tonbe, pli for e pour pli lontan; lasaler ki nou santi li pli for. Pli for ki bokou lannen pase e menm degradasyon later, lateras, lerozyon lakot, blansisaz koray i kontinyelman rapel nou ki sanzman klima i la.

Alor i enportan ki koman en Pti Leta Zil, nou fer serten adaptasyon avek kalite lenfrastruktir ki nou konstri. Akoz i zwe en rol kritik dan mitigasyon bann dezas e asir soutenabilite lonterm.

Mr Speaker, mon oule zis fer en mansyon ki dan mon distrik Port Glaud osi pa'n, nou pa'n ganny eparnye avek bann lefe sanzman klima. Akoz nou osi nou annan lanmer ki kontinyelman mont

lo semen. La vizavi Vilaz Prezidan, in en konsern ki bokou lannen bann drayver in plenmyen - bann - menm pyeton.

Me sirtou bann drayver akoz enn de drayver i dir mwan koman nou antre kot *Testing Station*, bann la i get anba nou loto i dir, 'ou sorti Port Glaud ou'.

So alor nou'n war ki i annan devlopman ki'n ganny fer *lately*, kot nou sey fer monte miray, kot miray in fer monte. Me nou war poudir pa ankor rezourd sa problem konpletman.

Me mon mazine sa i en bout travay e petet ek bann evalyasyon ki a ganny fer pli tar, i ava annan en lot bout travay ki a ganny fer, ki petet a rezourd en pe sa problem.

Nou osi annan lanmer ki kontinyen monte lo semen an alan Port Launay ki vin osi enkonvenyan pour bann drayver ek bann zabitan.

Me selman menm ki nou pe mazin tou sord fason pour nou rezourd sa bann problem. Mon mazin parol en vye grannwanr ki ti dir mwan, 'delo ou pa sanz son semen akoz ler i pour anmerde i pour repran son semen'.

So mon mazine nou a sey nou mye, pour rezourd li. Menm si petet nou pa pour arive fer li totalman. Mr Speaker, parey mon'n

mansyonnen oparavan, sa bann sanzman dan klima ki nou pe fer fas avek. I fer nou koman enn Pti Leta Zil, nou bezwen annan petet annan bann regilasyon en pe pli stik.

Pou fer ki bann lenfrastriktir, sirtou bann lo lakot i ganny fer dan en fason pour redwir ou menm anpes lerozyon lakot oubyen inondasyon.

Nou osi bezwen pran kont lo kalite konstriksyon ki nou fer dan montanny. Akoz li osi i poz son kalite lefe dan konstriksyon.

Akoz dan konstriksyon parfwa nou kapab pe, parey Onorab Loizeau in nonmen, parfwa lontan nou ti fouy fondasyon, e petet dan fer tousala i kapab nou pe bouz bann ros ki nou pa pe war.

E sa i afekte pli tar. Nou koup dan konstriksyon, dan montanny petet nou pe koup bokou pye dibwa. Akoz nou bezwen sa lespas.

E ki pli tar sa i fer ki later ki ganny ekspoze, avek bokou plis lapli i posibleman aport danze petet pour bann ki pli ba, ki kot sa konstriksyon pe ganny fer.

Mon konpran ki petet serten a argimante ki kan petet nou pour met en bann regilasyon e pe pli stik, ki pour retard bann konstriksyon, retard prosedir e menm petet vin pli ser.

Me petet i a vre, petet vre si nou pe al met bann regilasyon pli strik i pour al fer prosedir vin en pe pli long, pli ser. Me lo lot kote mon mazine ki nou tou nou ti a prefere fer en depans ki pli dirab, ki pli lonterm.

Mon osi konsyan bann dimoun la deor, nou abitye avek bann lenfrastriktir tradisyonnel ki nou'n toultan konnen.

Parey Onorab Loizeau in dir, nou met nou lakaz nou fouy nou fondasyon, nou fer nou lakaz ater. Nou pa pe retourn parey dan lepase nou pa pe fer parey dan lepase kot nou gran paran ti met lo de.

'Onorab Loizeau mwan mon ankor mazin lo de mwan, akoz mon osi mon annan enn pti laz la'.

Alor i enportan, mon mazine ki ava enportan ki annan en ledikasyon piblik ki swa lo televizyon oubyen lo radyo oubyen atraver bann *leaflet*. Ki a ganny fer - ou menm petet menm dan bann landrwa travay ki a edik nou bann dimoun lo rezon akoz nou bezwen sanz kalite lenfrastriktir ki nou fer.

E oubyen akoz serten lenfrastriktir i pour pli aplikab dan serten landrwa. Akoz mwan mon toultan mazine ki ledikasyon pour nou pep i fer ki anpes bann lakoler, bann

frustrasyon akòz nou pa pe konpran ki pe arive.

E sa osi letan bann, nou piblik i a konpran, i a ede ki zot pa senpleman envestir dan en lenfrazstriktir dapre zot swa avek en mank konesans. E pli tar zot war zot pe fer bann depans ekstra pour kapab protez zot propriyete.

Devlopman avek konesans, e ki soutenab i a ede redwir bann depans repetitiv, ki swa pour endividi oubyen menm Gouvènmman.

La Mr Speaker mon mazin - mon profite pour mwan enplor bann endividi, nou tou ki al dan konstriksyon swa kot nou Lakour, oubyen pour nou fer li pour en biznes. Pour nou vin pli responsab e konsyan. Kan en plan in ganny aprouve.

E ki nou fer nou konstriksyon dapre sa ki'n ganny aprouve. Akòz parfwa nou mazin mon a fer en pti aliterasyon avek, mon a fer enn pti sanzman, si zis mon ti sa mon met la i pa pour grav.

Me pli tar nou war ki i annan en reperkisyon ki anmenn en lenpak, swa direktman lo ou menm, ki'n fer sa konstriksyon, oubyen petet lo ou vwazen.

Mon pa pour al tro long Mr Speaker, akòz mon pour sey get mon letan mon osi. Me Mr Speaker mon pour termin la mwan an donnan mon sipor

Onorab William lo sa Mosyon, kot nou Lasanble pe demann tou bann lazans ki form parti Lotorite *Planning*, pour revwar zot lapros ver laprouvasyon bann lenfrazstriktir, prenon kont bann sanzman klima. Mersi Mr Speaker.

**(APPLAUSE)**

#### **MR DEPUTY SPEAKER**

Mersi Onorab e finalman dernyen entervenman avan *right of reply*. Onorab Woodcock.

#### **HON WAVEL WOODCOCK**

Mersi Mr Speaker. Nou tou nou konnen ki Sesel i enn Pti Leta Zil e nou bokou pli vilnerab anver bann lefe sanzman klima ki bann pli gran pei endistriyalize in koze.

E deza nou'n war nou lakot ki pe ganny manze, delo sale ki pe monte pe antre dan bann landrwa kot i pa ti pe arive oparavan.

Inondasyon, pye dibwa lo bann lakot pe derasinen, lo lakot Praslin ou war sa Grand Anse partou, Amitié. Later ki pe glise lanmar ki nivo delo pe monte sak fwa gro lapli. Gran mare e lezot fenomenn.

Mr Speaker nou osi trouve, a plizyer lenstans dan lepase kot plan plizyer lenfrazstriktir in ganny aprouve dan bann landrwa kot i evidan. Ki i pa rezistan ek

sanzman klima e nou'n vwar le konsekans pli tar.

Nou ankor war bann proze lakaz, batiman ki pe ganny konstrir dan bann landrwa kot delo i koule. Bann semen pe ganny fer san en plan drenaz apropiye.

E sa i en problem sistematik ki bezwen ganny adrese avek bokou irzans. Lotorite *Planning* i *network* avek plizyer lazans, parey *Survey*, Lasante, Sanniter, Lanvironnman, Transpor, Lotorite Distrik e lezot.

E zot tou zot annan en responsabilite pour fer sir ki bann proze i ganny aprouve i pa zis konform avek Lalwa, me i osi ki sa bann proze i rezistan e dirab pour lavenir.

Nou pa kapab kontinyen aprouv bann plan parey ki nou ti fer dan leparse. Klima in sanze e fason nou plan bann proze osi lenfrastruktir osi i bezwen sanze.

Sa pa vedir nou bezwen aret devlopman. Non me sa i vedir plito ki devlopman i bezwen ganny fer dan en fason ki protez nou pep, nou later nou resours e nou fitir zenerasyon.

Mr Speaker, dan mon distrik, parey bokou lezot nou'n war proze ki'n ganny aprouve san ki lanvironnman ti ganny byen evalye.

Aprè sa bann problem in arive, inondasyon, blokaz,

blokaz delo, lakaz ki pe ganny andomaze akòz zot lokasyon e osi akòz move planifikasyon.

Proze in ganny fer dan bann landrwa ki annan lanbousir. Lanbousir in bloke in bouse, ki koz inondasyon. Bann proze lakaz e lezot batiman in sanz larout plizyer larivyer ki pe *erode*, plizyer later, plizyer propriyete.

Mon'n osi lans en lapel pour ki Lotorite *Planning* i annan en lapros pli entegre avek bann lazans ki bezwen ki *EIA* i bezwen ganny fer *Environmental Impact Assessment* i bezwen ganny fer e ki bann analiz pli profon i ganny fer, ler pe fer bann sirtou bann gro, gro proze dan bann distrik.

Fodre pa zis gete si en proze i bon ozordi me si i pour tenir 10an, 20an dan sa klima ki pe vin deplizanpli sever.

I annan plizyer lenstans bann proze ki Gouvernman in bidzete, pour antreprann dan bokou landrwa lo Mahe menm Praslin ki apre Gouvernman in bezwen revize akòz difikilte avek teren.

E bann lenpak ki kapab anmennen lo sa lenfrastruktir, menm lo lanvironnman. Mon a donn legzanp Mr Speaker, proze 8-unit Mont Plaisir.

Aprè ki teren ti ganny netwaye kontrakter ek bann teknisyen in war plizyer problem. Sirtou avek delo ki

pas lo sa later, e ki ti nesesit bokou depans e mitigasyon pour fer sa proze.

En proze ki ti pour kout R17milyon pour fer zis 8 *unit* e finalman nou'n war en teren ki pli apropiye Mr Speaker, ki avek menm kantite larzan nou kapab fer bokou plis *unit* ki pour benefisye plis fanmir.

Nou pa kapab pran zis desizyon politik. Nou bezwen pran bann desizyon ki responsab. E nou tou nou bezwen responsab dan nou bann desizyon ki nou pran.

E mon senserman krwar ki nou bann dimoun dan kominote i annan en rol enportan pour zwe. Souvandfwa zot konnen kot delo i koule, kot later i glise, sa bann konesans lokal i annan valer i devret ganny pran an konsiderasyon dan laprouvasyon plan. Fodre konsilte nou bann dimoun.

Kot i konsern bann *issue* lerozyon lakot dan mon distrik Grand Anse Praslin - e lo Praslin an zeneral mon'n - a plizyer repriz dan sa Lasanble, sizyenm Lasanble koz e demann plizyer kestryon lo sa size ki Mosyon pe adrese ozordi.

Sa problemn i pa en problemn ki zis Ladministrasyon LDS, ki pe *deal* avek. Ladministrasyon US osi dan lepase in fer fas avek menm problemn. Wi

serten travay *emergency* in ganny fer pour *mitigate* sa problemn. Sirtou lo lakot Amitié. Anba US en *rock armoring* ti ganny fer vizavi Airport Amitie. Me sa *rock armoring* pa'n tenir.

Mon rapel ler ansyen Vis-Prezidan Meriton ti vin Praslin, apre ki lanmer, gro laroul ti'n kas *warehouse STC* Grand Anse Praslin an de e andomaz marsandiz. E a de repriz semen ti grennen vizavi *airport* e par devan *SPTC*.

Mon'n fer plizyer vizit lo sa *site* e lezot *site* dan lepase; Amitié, Ros Korbizo, Anse Kerlan, Saint Sauver, La Pointe, Consolation, Anse Marie Louise.

E lo sa sit Amitié Ros Korbizo Mr Speaker - e lo sa sit Amitié mon'n fer vizit avek bann Minis, lepase. Mon'n fer vizit avek Minis Cosgrow ki ti Minis Lanvironnman sa letan ; Minis Joubert e osi a de repriz avek Prezidan.

E travay tanporer ti ganny fer pour bar en pe sa gro lenpak laroul. In ede pour en pe letan ziska pli gro proze ki ti pour demare avek en Bidze R29.3milyon an 2024.

Malerezman kontrakter ki ti pour fer sa proze - kou ki zot in demande pour sa Proze *Coastal Management* i bokou plis ki sa ki'n ganny bidzete. E nou ti bezwen retourn lo *drawing board* pour deside si

pour fer sa *rock armoring* 18 met an deor e *backfill* par deryer.

Ouswa fer en *breakwater* ouswa en konbinezon tou le de. Mon ti lo sa sit tar lannen pase, avek en delegasyon plizyer teknisyen e en nouvo plan ti ganny drafte e negosyasyon avek kontrakter i byen avanse.

Mon pa krwar sa proze pour demare pandan vannswet. Me mon donn en langazman zabitan Grand Anse Praslin ki sa proze pour ganny fer.

Zot in tann mwan an ses a plizyer repriz koz lo sa *site*. Menm si *US* parfwa i fer bann politik bon marse lo sa size, ki dayer zot pa'n fer nanryen, en ladministrasyon *LDS* i angaze pour rod solisyon, Mr Speaker. Me sa i en problem lo tou nou zil - dan tou distrik.

Onorab Gill pour dakor avek mwan Cote D'Or, Onorab Uranie pour dakor avek mwan La Digue. Problem lerozyon lakot, lo Mahe, Au Cap, Baie Lazare, Anse Boileau e dan plizyer rezyon. E bann gro pei osi Mr Speaker, i bezwen pran responsabilite pour ed nou, atraver ozordi i annan sa bann *Climate Change Fund*.

Nou bezwen *tap into* sa bann *fund* Mr Speaker, pour nou kapab. Pour nou ganny sipor pour nou kapab ede avek sa bann kou.

Akoz i pa kout enn pti sonm Mr Speaker, pour *coastal management* dan tou distrik. Sirtou bann distrik o bor lakot lo tou bann zil. I kout en kantite, en kantite i kout plizyer milyon.

Parey mon'n dir sa proze Amitié ti pour kout R29.3milyon *originally budgeted but* larzan pa ase. Sa ki kontrakter pe demande i kout bokou, bokou plis larzan.

E sa problem i partou. Onorab Gill i konnen, Onorab Porice. E bokou nou bann Manm ki la nou konnen. I pa en keksoz ki fasil, nenport ki Ladministrasyon ki la ki pour vini, 20an, 30an *from now* nou pour *deal* avek sa size.

E Gouvernman pour *still* bezwen depans en kantite larzan pour nou *mitigate* sa problem. E nou bezwen tou sipor. Bann konsiltan i annan en kantite ozordi, nou bezwen zot sipor. Nou bezwen vin ansanm koman en pei, koman en pep, irelevan nou lapartenans politik. Nou tou nou ganny afekte, nou bezwen rod en solisyon pour nou ede redwir sa bann problem, ki parey mon'n dir, nou tou dan bann distrik e ki balizaz avek en lakot nou pe fer fas avek.

E alor Mr Speaker, sa Mosyon ki devan nou, i enn ki nou bezwen pran kont, nou bezwen pran li serye, e nou bezwen donn sipor. Avek sa de

mo, mon dir ou mersi Mr Speaker.

### **MR DEPUTY SPEAKER**

Mersi Onorab. E finalman in ariv ler pour nou tann drwa de repons loter Mosyon Onorab William.

### **HON WAVEN WILLIAM**

Mersi Mr Speaker. Mr Speaker, tou dabor mon ti a kontan remersi tou bann Manm ki'n koze lo sa Mosyon. Mersi pour bann kontribisyon valab. E pour bann rekomandasyon ki zot in fer.

E mon konnen poudir zot bann entervansyon in atir latansyon piblik osi deor. E nou bezwen kontinyen Mr Speaker, avek sansibilizasyon pep vizavi defi sanzman klima.

Mr Speaker, mon ti a kontan ki anba 'rekomandasyon', mon krwar poudir *DRMD*, i vreman annan en gran rol vizavi amenazman avek devlopman bann *physical infrastructure*.

Mon ti a kontan rekomannde ki si zot pa ankor form parti Lotorite *Planning* bann striktir, ki zot ganny enkorpore.

Mr Speaker, rezon mon pe dir sa se ki letan mon pe fer en pe resers, mon pe vwar pour dir sa laspe *hydrology* avek *geologist* i vreman enportan. Akoz enn pe *deal* avek seans pour fer avek letid

lo later. E enn pour fer avek delo.

Mon pe dir sa Mr Speaker akoz mon pe refer avek distrik Grand Anse Mahe. Letan mon pe get bann devlopman bann *land bank* ki'n ganny fer dan lepase osi La Misère, baze lo bann konstriksyon ki'n ganny fer avek ozordi - lafason ki delo pe vreman vin en problemn pour bann lenfrastriktir in ganny mete, i fer ou poz kestyon *whether* ozordi avek sanzman ; par lefe ki parey Onorab Loizeau in dir, nou pe ganny pli bokou lapli dan en sel moman.

Par egzanp nou kapab ganny kantite lapli ki ti kapab pour 1an. Be dan enn ou detrwa zour, ki fer ki ou annan en kantite delo. E ou annan sa laspe *saturation point*, kot later in nepli kapab enbibe. Akoz enn nou'n koup bokou pye dibwa.

E la ankor mon ti ava rekomannde ki Lotorite i revwar letan nou pe fer devlopman nou pe koup bokou pye dibwa. E i annan sa program dan distrik Gouvernman Lokal avek Lanvironnman, kot i annan bann demann pour koup plis pye dibwa ankor.

Be annou pa zis koupe, annou revwar osi ki mannyer nou kapab *factor in*, en program rebwazman. Akoz ler ou pe koupe ou pe les sa

teren *bare* e i *prone* tou *erosion*.

E sa letan mon pe regard Beauvoir La Misère, mon pe regard an desandan pour al Grand Anse Mahe kot ti annan sa deboulir later Mr Speaker, ozordi ek gro lapli bann landrwa ki ti napa delo pe pase ozordi pe pase. E i annan bann ros ki dan lavenir ki i pour en menas pour lavi, avek propriyete.

So mon ti ava demande ki atraver sa Mosyon letan mon pe dir revwar lapros, revwar enn pti pe tou sa bann laspe.

Epi la i kree en loportinite aköz i annan sa *forum - Joint Economic Forum* ki Gouvernman pe lanse avek sekter prive. Mon krwar i en bon lokazyon pour *factor in* osi sa size sanzman klima dan zot bann diskisyon. E dan bann desizyon ki zot pour pran aköz i annan pou fer avek devlopman sosyoekonomik Sesel. Alor i pour enportan ki zot osi *factor in*, sa laspe sanzman klima dan bann desizyon e bann aksyon ki zot pour pran.

Mr Speaker, mon santi poudir ozordi osi, i annan sa nesesite pour revwar osi serten bann Lalwa ki annan pour fer avek bann diferan lazans Gouvernman, ki annan pou fer avek devlopman.

Akoz i nepli mon kapab dir serten, mon pa pou dir valab - me i annan sa nesesite petet pour ranforsi enn pti pe vizavi proteksyon nou lanvironnman, an menm tan met lanfaz lo sa laspe soutenabilite.

Mr Speaker, mon santi poudir avek reform ki Minister Ledikasyon pe al fer dan sistenm ledikasyon, la ankor mon demande ki i *across the board* sa size sanzman klima, sa size soutenabilite, e ganny *factor in* aköz zenerasyon fitir i enportan ki zot kapab, re-os sa devwar vizavi proteksyon nou lanvironnman e soutenabilite dan son totalite.

Mr Speaker, mon osi demande ki bann dimoun ki annan pour fer avek *design* bann plan lakaz. Mr Speaker, ozordi letan ou pas dan bann *housing estate*. Lafason ki zot ete avek lasaler, sirtou bann vye dimoun - pa zis bann vye dimoun, bann pti baba, me ou santi sa lasaler ki akimile dan lakaz e ou demande si parfwa bann ki pe *supervise* konstriksyon zot in prevwar poudir dan plafon si i annan - i annan en serten *lining* ki zot mete pour anpes enn pti pe sa lasaler akimile. An menm tan vantilasyon.

E Mr Speaker, nou vwar osi poudir drenaz en plan drenaz prensipal kot bann Lakour i kapab letan zot met

zot dalo kapab anvoy zot delo dalo ouswa zot bann desarz dan en *main drain*.

E mon kontan ki ozordi anba sa ladministrasyon, konpare avek lontan avek devlopman - mon pa pe blanm personn. Me solman nou'n war poudir i annan en depar, en depar *the way from* zis koz fer lakaz donn dimoun.

Me ozordi nou pe balans osi sa laspe, fer bann *STP*, bann *Sewage Treatment Plant* pour kapab anmas bann desarz lakaz, ki dan lepase petet nou ti pe neglize lo la. Me nou pe vwar poudir ozordi, i pe vin en problem si nou pa pe fer li.

E mon annan plezir pour anons bann zabitan Grand Anse Mahe poudir i annan en gro *sewage plant* proze ki pe al ganny fer byento.

E sa i pour anmas bann desarz kot parey mon'n deza dan lepase, anmenn Mosyon anmenn kestyon lo *Sewage Treatment Plant*. E la finalman enn gro pe al ganny fer, pour anmas desarz dan mazorite sa bann *housing estate* dan Grand Anse Mahe.

Mr Speaker, alors vizavi demann ki sa Mosyon pe met devan, mon krwar poudir i annan merit. E i demann zefor tou dimoun, tou Seselwa pour ede pour fer sir ki sa laspe soutenabilite avek defi sanzman klima, nou pran li o

serye. Mr Speaker, I *beg to move*. Mersi.

**(APPLAUSE)**

### **MR DEPUTY SPEAKER**

Mersi Onorab. Donk sa ti drwa repons loter Mosyon. Mosyon dan non Onorab William *MNA* pour Grand Anse Mahe. E avan nou pran vot mon ava relir pour dimoun konnen lekel Mosyon ki nou pe vot lo la.

Mosyon i lir koumsa:- Lasanble i demann tou bann lazans ki form Lotorite *Planning*, pour revwar zot lapros ver laprouvasyon plan lenfrastruktir, prenon kont defi sanzman klima.

Mon ava demann tou bann Manm ki an faver pour endike silvouple ? Mersi. Okenn Manm ki kont?

Mersi Madanm Deputy. Donk, Mosyon ki mon fek lir rezilta vot i koumsa, i annan 26 Manm ki'n vot an faver. Napa Manm ki'n vot kont e i annan 2 Manm ki'n abstenir. Donk sa vot in pase.

Avek sa nou'n ariv lafen nou sesyon travay pour sa semenn. Mon ava remerci zot pour zot partisipasyon.

Lasanble pour *adjourn* la. Nou annan *meeting ABC* e wi, parske nou'n asize ziske sa ler. Mon a donn zot en pe letan pour manze nou ava zwenn 1er edmi. I konvenab pour zot?

1 er edmi *ABC* i ava *zwenn*.  
Donk Lasanble i ava *adjourn* e  
nou ava repran travay Mardi  
9er bomaten.

**(*ADJOURNMENT*)**